

欽定唐書

卷之九十四  
四六四

唐書卷四十六

宋翰 林學士 歐陽修 撰

志第三十六

百官志

唐之官制其名號祿秩雖因時增損而大抵皆沿隋故其官司之別曰省曰臺曰寺曰監曰衛曰府各統其屬以分職定位其辨貴賤敘勞能則有品有爵有勲有階以時考覈而升降之所以任羣材治百事其爲法則精而密其施於事則簡而易行所以然者由職有常守而位有常員也方唐之盛時其制如此蓋其始未嘗不欲

立制度明紀綱爲萬世法而常至於交侵紛亂者由其時君不能慎守而徇一切之苟且故其事愈繁而官益冗至失其職業而卒不能復初太宗省內外官定制爲七百三十員曰吾以此待天下賢材足矣然是時已有員外置其後又有特置同正員至於檢校兼守判知之類皆非本制又有置使之名或因事而置事已則罷或遂置而不廢其名類繁多莫能徧舉自中世已後盜起兵興又有軍功之官遂不勝其濫矣故採其綱目條理可爲後法及事雖非正後世遵用因仍而不能改者著于篇宰相之職佐天子總百官治萬事其任重矣然自

漢以來位號不同而唐世宰相名尤不正初唐因隋制以三省之長中書令侍中尚書令共議國政此宰相職也其後以太宗嘗爲尚書令臣下避不敢居其職由是僕射爲尚書省長官與侍中中書令號爲宰相其品位旣崇不欲輕以授人故常以他官居宰相職而假以他名自太宗時杜淹以吏部尚書參議朝政魏徵以祕書監參預朝政其後或曰參議得失參知政事之類其名非一皆宰相職也貞觀八年僕射李靖以疾辭位詔疾小瘳三兩日一至中書門下平章事而平章事之名蓋起於此其後李勣以太子詹事同中書門下三品謂同

侍中中書令也而同三品之名蓋起於此然二名不專用而佗官居職者猶假佗名如故自高宗以後爲宰相者必加同中書門下三品雖品高者亦然惟三公三師中書令則否其後改易官名而張文瓘以東臺侍郎同東西臺三品同三品入銜自文瓘始永淳元年以黃門侍郎郭待舉兵部侍郎岑長倩等同中書門下平章事平章事入銜自待舉等始自是以後終唐之世不能改初三省長官議事于門下省之政事堂其後裴炎自侍中遷中書令乃徙政事堂於中書省開元中張說爲相又改政事堂號中書門下列五房于其後一日吏房二

曰樞機房三日兵房四日戶房五日刑禮房分曹以主  
衆務焉宰相事無不統故不以一職名官自開元以後  
常以領他職實欲重其事而反輕宰相之體故時方用  
兵則爲節度使時崇儒學則爲大學士時急財用則爲  
鹽鐵轉運使又其甚則爲延資庫使至於國史太清宮  
之類其名頗多皆不足取法故不著其詳學士之職本  
以文學言語被顧問出入侍從因得參謀議納諫諍其  
禮尤寵而翰林院者待詔之所也唐制乘輿所在必有  
文詞經學之士下至卜醫伎術之流皆直於別院以備  
宴見而文書詔令則中書舍人掌之自太宗時名儒學

士時時召以草制然猶未有名號乾封以後始號北門  
學士玄宗初置翰林待詔以張說陸堅張九齡等爲之  
掌四方表疏批答應和文章旣而又以中書務劇文書  
多壅滯乃選文學之士號翰林供奉與集賢院學士分  
掌制詔書敕開元二十六年又改翰林供奉爲學士別  
置學士院專掌內命凡拜免將相號令征伐皆用白麻  
其後選用益重而禮遇益親至號爲內相又以爲天子  
私人凡充其職者無定員自諸曹尚書下至校書郎皆  
得與選入院一歲則遷知制誥未知制誥者不作文書  
班次各以其官內宴則居宰相之下一品之上憲宗時

又置學士承旨唐之學士弘文集賢分隸中書門下省而翰林學士獨無所屬故附列於此云

三師三公

太師太傅太保各一人是爲三師太尉司徒司空各一人是爲三公皆正一品三師天子所師法無所總職非其人則闕三公佐天子理陰陽平邦國無所不統親王拜者不親事祭祀闕則攝

隋廢三師貞觀十一年復置與三公皆不設官屬

尚書省尚書令一人正二品掌典領百官其屬有六尚

書一曰吏部二曰戶部三曰禮部四曰兵部五曰刑部

六曰工部

六尚書兵部吏部爲前行刑部戶部爲中行工部禮部爲後行行總四司以本行爲頭司



餘爲庶務皆會決焉凡上之逮下其制有六一日制二

日勅三日冊天子用之四日令皇太子用之五日敎親

王公主用之六日符省下於州州下於縣縣下於鄉下

之達上其制有六一日表二日狀三日牋四日啓五日

辭六日牒諸司相質其制有三一日關二日刺三日移

凡授內外百司之事皆印其發日爲程一日受二日報

諸州計奏達京師以事大小多少爲之節凡符移關牒

必遣於都省乃下天下大事不決者皆上尚書省凡制

勅計奏之數省符宣告之節以歲終爲斷龍朔二年改尚書省日中

臺廢尚書令尚書曰太常伯侍郎曰少常伯光宅元年改尚書省曰文昌臺俄曰文昌都省垂拱元年曰都臺

長安三年

日中臺

左右僕射各一人從二品掌統理六官爲令之貳令闕

則總省事劾御史糾不當者

龍朔二年改左右僕射曰左右匡政光宅元年曰文

昌左右相開元元年曰左右丞相天寶元年復

左丞一人正四品上右丞一人正四品下掌辦六官之

儀糾正省內劾御史舉不當者吏部戶部禮部左丞總

焉兵部刑部工部右丞總焉郎中各一人從五品上員

外郎各一人從六品上掌付諸司之務舉稽違署符目

知宿直爲丞之貳以都事受事發辰察稽失監印給紙

筆以主事令史書令史署覆文案出符日以亭長啓閉

傳禁約以掌固守當倉庫及陳設諸司皆如之

隋尚書省諸司

郎及承務郎各一人而廢左右司武德三年改諸司郎為郎中承務郎為員外郎貞觀元年復置左右司郎中龍朔元年改左右丞曰左右肅機郎中曰左右承務諸司郎中曰大夫永昌元年復置員外郎神龍元年省明年復置初有駟驛百人掌乘傳送符後廢

都事各六人從七品上主事各六人從八品下吏部考

功禮部主書皆如之諸司主事從九品上

有令史各十八人書令史

各三十六人亭長各六人掌固各十四人

吏部尚書一人正三品侍郎二人正四品上郎中二人

正五品上員外郎二人從六品上掌文選勳封考課之

政以三銓之法官天下之材以身言書判德行才用勞

效較其優劣而定其留放爲之注擬五品以上以名上而聽制授六品以下量資而任之其屬有四一曰吏部二曰司封三曰司勳四曰考功吏部郎中掌文官階品朝集祿賜給其告身假使一人掌選補流外官員外郎二人從六品上一人判南曹皆爲尚書侍郎之貳凡文官九品有正有從自正四品以下有上下爲三十等凡文散階二十九從一品曰開府儀同三司正二品曰特進從二品曰光祿大夫正三品曰金紫光祿大夫從三品曰銀青光祿大夫正四品上曰正議大夫正四品下曰通議大夫從四品上曰太中大夫從四品下曰中大

夫正五品上曰中散大夫正五品下曰朝議大夫從五  
品上曰朝請大夫從五品下曰朝散大夫正六品上曰  
朝議郎正六品下曰承議郎從六品上曰奉議郎從六  
品下曰通直郎正七品上曰朝請郎正七品下曰宣德  
郎從七品上曰朝散郎從七品下曰宣義郎正八品上  
曰給事郎正八品下曰徵事郎從八品上曰承奉郎從  
八品下曰承務郎正九品上曰儒林郎正九品下曰登  
仕郎從九品上曰文林郎從九品下曰將仕郎自四品  
皆番上於吏部不上者歲輸資錢三品以上六百六品  
以下一千水旱蟲霜減半資有文藝樂京上者每州七

人六十不樂簡選者罷輸勲官亦如之以征鎮功得護軍以上者納資減三之一凡流外九品取其書計時務其校試銓注與流內略同謂之小選吏部主事四人司封主事二人司勲主事四人考功主事三人武德五年改選部曰吏部七年省侍郎貞觀二年復置龍朔元年改吏部曰司列主爵曰司封考功曰司績武后光宅元年改吏部曰天官垂拱元年改主爵曰司封天寶十一載改吏部曰文部至德二載復舊有吏部令史三十人書令史六十一人制書令史十四人甲庫令史十一人亭長八人掌固十二人司封令史四人書令史九人掌固四人司勲令史三十三人書令史六十七人掌固四人考功令史十五人書令史三十人掌固四人司封郎中一人從五品上員外郎一人從六品上諸郎中員外郎品皆如之掌封命朝會賜予之級凡爵九等

一曰王食邑萬戶正一品二曰嗣王郡王食邑五千戶  
從一品三曰國公食邑三千戶從一品四曰開國郡公  
食邑二千戶正二品五曰開國縣公食邑千五百戶從  
二品六曰開國縣侯食邑千戶從三品七曰開國縣伯  
食邑七百戶正四品上八曰開國縣子食邑五百戶正  
五品上九曰開國縣男食邑三百戶從五品上皇兄弟  
皇子皆封國爲親王皇太子子爲郡王親王之子承嫡  
者爲嗣王諸子爲郡公以恩進者封郡王襲郡王嗣王  
者封國公皇姑爲大長公主正一品姊爲長公主女爲  
公主皆視一品皇太子女爲郡主從一品親王女爲縣

主從二品凡王公十五以上預朝集宗親女婦諸王長女月二參內命婦一品母爲正四品郡君二品母爲從四品郡君三品四品母爲正五品縣君凡諸王公主外戚之家卜祝占相不入門王妃公主郡縣主嫠居有子者不再嫁凡外命婦有六王嗣王郡王之母妻爲妃文武官一品國公之母妻爲國夫人三品以上母妻爲郡夫人四品母妻爲郡君五品母妻爲縣君勲官四品有封者母妻爲卿君凡外命婦朝參視夫子之品諸蕃三品以上母妻授封以制流外技術官不封母妻親王孺人二人視正五品媵十人視從六品二品媵八人視正



七品國公及三品勝六人視從七品四品勝四人視正八品五品勝三人視從八品凡置勝上其數補以告身散官三品以上皆置勝凡封戶三丁以上爲率歲租三之一入于朝廷食實封者得真戶分食諸州皇后諸王公主食邑皆有課戶名山大川畿內之地皆不以封

司勳郎中一人員外郎二人掌官吏勳級凡十有二轉爲上柱國視正二品十有一轉爲柱國視從二品十轉爲上護軍視正三品九轉爲護軍視從三品八轉爲上輕車都尉視正四品七轉爲輕車都尉視從四品六轉爲上騎都尉視正五品五轉爲騎都尉視從五品四轉

爲驍騎尉視正六品三轉爲飛騎尉視從六品二轉爲雲騎尉視正七品一轉爲武騎尉視從七品凡以功授者覆實然後奏擬戰功則計殺獲之數堅城苦戰功第一者三轉出少擊多曰上陣兵數相當曰中陣出多擊少曰下陣矢石未交陷堅突衆敵因而敗者曰跳盪殺獲十之四曰上獲十之二曰中獲十之一曰下獲凡酬功之等見任前資常選曰上資文武散官衛官勲官五品以上曰次資五品以上子孫上柱國柱國子勲官六品以下曰下資白丁衛士曰無資跳盪人上資加二階次資下資無資以次降凡上陣上獲五轉中獲四轉下

獲三轉第二第三等遞降焉中陣之上獲眠上陣之中  
獲中獲眠上陣之下獲下獲兩轉下陣之上獲眠中陣  
之中獲中獲眠中陣之下獲下獲一轉破蠻獠上陣上  
獲比兩番降二轉凡勲官九百人無職任者番上於兵  
部眠遠近爲十二番以彊幹者爲番頭留宿衛者爲番  
月上外州分五番主城門倉庫執刀上柱國以下番上  
四年驍騎尉以下番上五年簡於兵部授散官不第者  
五品以上復番上四年六品以下五年簡如初再不中  
者十二年則番上六年八年則番上四年勲至上柱國  
有餘則授周以上親無者賜物太常音聲人得五品以

上勳非征討功不除簿諸州授勳人歲第勳之高下三月一報戶部有蠲免必驗

考功郎中員外郎各一人掌文武百官功過善惡之考法及其行狀若死而傳於史官謚于太常則以其行狀質其當不其欲銘于碑者則會百官議其宜述者以聞報其家其考法凡百司之長歲較其屬功過差以九等大合衆而讀之流內之官敘以四善一曰德義有聞二曰清慎明著三曰公平可稱四曰恪勤匪懈善狀之外有二十七最一曰獻可替否拾遺補闕爲近侍之最二曰銓衡人物擢盡才良爲選司之最三曰揚清激濁褒

貶必當爲考校之最四曰禮制儀式動合經典爲禮官之最五曰音律克諧不失節奏爲樂官之最六曰決斷不滯與奪合理爲判事之最七曰部統有方警守無失爲宿衛之最八曰兵士調習戎裝充備爲督領之最九曰推鞠得情處斷平允爲法官之最十曰讐校精審明於刊定爲校正之最十一曰承旨敷奏吐納明敏爲宣納之最十二曰訓導有方生徒克業爲學官之最十三曰賞罰嚴明攻戰必勝爲軍將之最十四曰禮義興行肅清所部爲政教之最十五曰詳錄典正詞理兼舉爲文史之最十六曰訪察精審彈舉必當爲糾正之最十

七日明於勘覆稽失無隱爲句檢之最十八日職事脩理供承彊濟爲監掌之最十九日功課皆充丁匠無怨爲役使之最二十日耕耨以時收穫成課爲屯官之最二十一曰謹於蓋藏明於出納爲倉庫之最二十二曰推步盈虛究理精密爲歷官之最二十三曰占候醫卜效驗多者爲方術之最二十四曰檢察有方行旅無壅爲關津之最二十五曰市廛弗擾姦濫不行爲市司之最二十六曰牧養肥碩蕃息孳多爲牧官之最二十七曰邊境清肅城隍脩理爲鎮防之最一最四善爲上上一最三善爲上中一最二善爲上下無最而有二善爲

中上無最而有一善爲中中職事粗理善最不聞爲中  
下愛憎任情處斷乖理爲下上背公向私職務廢闕爲  
下中居官飾詐貪濁有狀爲下下凡定考皆集於尚書  
省唱第然後奏親王及中書門下京官三品以上都督  
刺史都護節度觀察使則奏功過狀以覈考行之上下  
每歲尚書省諸司具州牧刺史縣令殊功異行災蝗祥  
瑞戶口賦役增減盜賊多少皆上於考司監領之官以  
能撫養役使者爲功有耗亡者以十分爲率一分爲一  
殿博士助教計講授多少爲差親勲翊衛以行能功過  
爲三等親勲翊衛備身東宮親勲翊衛備身王府執仗

親事執乘親事及親勲翊衛主帥校尉直長品子雜任  
飛騎皆上中下考有二上第者加階番考別爲簿以待  
郎顯掌之流外官以行能功過爲四等清謹勤公爲上  
執事無私爲中不勤其職爲下貪濁有狀爲下下凡考  
中上以上每進一等加祿一季中中守本祿中下以下  
每退一等奪祿一季中品以下四考皆中中者進一階  
一中上考復進一階一上下考進二階計當進而參有  
下考者以一中上覆一中下以一上下覆二中下上中  
以上雖有下考從上第有下下考者解任凡制勅不便  
有執奏者進其考貞觀初歲定京官望高者二人分校



京官外官考給事中中書舍人各一人涖之號監中外  
官考使考功郎中判京官考員外郎判外官考其後屢  
置監考校考知考使故事考簿朱書吏緣爲姦咸通十  
四年始以墨

戶部尚書一人正三品侍郎二人正四品下掌天下土  
地人民錢穀之政貢賦之差其屬有四一曰戶部二曰  
度支三曰金部四曰倉部戶部郎中員外郎掌戶口土  
田賦役貢獻蠲免優復媼婚繼嗣之事以男女之黃小  
中丁老爲之帳籍以永業口分園宅均其土田以租庸  
調歛其物以九等定天下之戶以爲尚書侍郎之貳其

後以諸行郎官判錢穀而戶部度支郎官失其職矣會  
昌二年著令以本行郎官分判錢穀戶部巡官二人主  
事四人度支主事二人金部主事三人倉部主事三人  
高宗卽位改民部曰戶部龍朔三年改戶部曰司元度  
支曰司度金部曰司珍倉部曰司庾光宅元年改戶部  
曰地官天寶十一載改金部曰司金倉部曰司儲有戶  
部令史十七人書令史三十四人計史一人亭長六人  
掌固十人度支令史十六人書令史三十三人計史一  
人掌固四人金部主事三人令史十人書令史二十一  
人計史一人掌固四人倉部令史十二人  
書令史二十三人計史一人掌固四人  
度支郎中員外郎各一人掌天下租賦物產豐約之宜  
水陸道涂之利歲計所出而支調之以近及遠與中書  
門下議定乃奏

金部郎中員外郎各一人掌天下庫藏出納權衡度量之數兩京市互市和市宮市交易之事百官軍鎮蕃客之賜及給宮人王妃官奴婢衣服

倉部郎中員外郎各一人掌天下軍儲出納租稅祿糧倉廩之事以木契百合諸司出給之數以義倉常平倉備凶年平穀價

禮部尚書一人正三品侍郎一人正四品下掌禮儀祭享貢舉之政其屬有四一曰禮部二曰祠部三曰膳部四曰主客禮部郎中員外郎掌禮樂學校衣冠符印表疏圖書冊命祥瑞鋪設及百官宮人喪葬贈賻之數爲

尚書侍郎之貳五禮之儀一日吉禮二曰賓禮三曰軍禮四曰嘉禮五曰凶禮凡齊衰心喪以上奪情從職及周喪未練大功未葬皆不預宴大功以上喪受冊涖官鼓吹從而自作戎事則否凡朝晚入失儀御史錄名奪俸三奪者奏彈凡出蕃冊授弔贈者給衣冠皇帝巡幸兩京文武官職事五品以上月朔以表參起居近州刺史遣使一參留守月遣使起居北都則四時遣使起居諸司奏大事者前期三日具狀長官躬署對仗伏奏仗下中書門下涖讀河南太原府父老每歲上表願駕幸遣使以聞駕在都則京兆府亦如之凡景雲慶雲爲大

瑞其名物六十有四白狼赤兔爲上瑞其名物三十有八蒼烏朱鴈爲中瑞其名物三十有二嘉禾芝草木連理爲下瑞其名物十四大瑞則百官詣闕奉賀餘瑞歲終員外郎以聞有司告廟凡喪二品以上稱薨五品以上稱卒自六品達于庶人稱死皇親三等以上喪舉哀有司帳具給食諸蕃首領喪則主客鴻臚月奏禮部主事二人祠部主事二人膳部主事二人主客主事二人武德三年改儀曹郎曰禮部郎中司藩郎曰主客郎中龍朔二年改禮部曰司禮祠部曰司禋膳部曰司膳光宅元年改禮部曰春官有禮部令史五人書令史十三人亭長六人掌固八人祠部令史六人書令史十三人掌固四人主客令史四人書令史九人掌固四人

祠部郎中員外郎各一人掌祠祀享祭天文漏刻國忌  
廟諱卜筮醫藥僧尼之事珠玉珍寶供祭者不求於市  
駕部比部歲會牲之死亡輸皮於太府郊祭酒醴脯醢  
黍稷果實所司長官封署以供兩京及磧西諸州火祆  
歲再祀而禁民祈祭凡巡幸路次名山大川聖帝明王  
名臣墓州縣以官告祭二王後享廟則給牲牢祭器而  
完其帷帟几案主客以四時省問凡國忌廢務日內教  
太常停習樂兩京文武五品以上及清官七品以上行  
香於寺觀凡名醫子弟試療病長官泄覆三年有驗者  
以名聞

膳部郎中員外郎各一人掌陵廟之牲豆酒膳諸司供奉口味躬鑄其輦乃遣進胙亦如之非大禮大慶不獻食不進口味凡羊至廚而乳者釋之長生大齋日尚食進蔬食釋所殺羊爲長生供奉凡獻食進口味不殺犢尚食有猝須別索必奏覆月終而會之凡尚食進食以種取而別嘗之殿中省主膳上食於諸陵以番上下四時遣食醫主食各一人涖之

主客郎中員外郎各一人掌二王後諸蕃朝見之事二王後子孫視正三品鄴公歲賜絹三百米粟亦如之介公減三之一殊俗入朝者始至之州給牒覆其人數謂

之邊牒蕃州都督刺史朝集日視品給以衣冠袴褶乘  
傳者日四驛乘驛者六驛供客食料以四時輸鴻臚季  
終旬會之客初至及辭設會第一等視三品第二等視  
四品第三等視五品蕃望非高者視散官而減半參日  
設食路由大海者給祈羊豕皆一西南蕃使還者給入  
海程糧西北諸蕃則給度磧程糧蕃客請宿衛者奏狀  
貌年齒突厥使置市坊有貿易錄奏爲質其輕重太府  
丞一人涖之蕃王首領死子孫襲初授官兄弟子降一  
品兄弟子代攝者嫡年十五還以政使絕域者還上聞  
見及風俗之宜供饋贈貺之數



兵部尙書一人正三品侍郎二人正四品下掌武選地  
圖車馬甲械之政其屬有四一曰兵部二曰職方三曰  
駕部四曰庫部凡將出征告廟授斧鉞軍不從令大將  
專決還日具上其罪凡發兵降勅書於尙書尙書下文  
符放十人發十馬軍器出十皆不待勅衛士番直發一  
人以上必覆奏諸蕃首領至則備威儀郊導凡俘馘酬  
以絹入鈔之俘歸於司農郎中一人判帳及武官階品  
衛府衆寡校考給告身之事一人判簿及軍戎調遣之  
名數朝集祿賜假告之常員外郎一人掌貢舉雜請一  
人判南曹歲選解狀則覈簿書資歷考課皆爲尙書侍

郎之貳武散階四十有五從一品曰驃騎大將軍正二品曰輔國大將軍從二品曰鎮軍大將軍正三品上曰冠軍大將軍懷化大將軍正三品下曰懷化將軍從三品上曰雲麾將軍歸德大將軍從三品下曰歸德將軍正四品上曰忠武將軍正四品下曰壯武將軍懷化中郎將從四品上曰宣威將軍從四品下曰明威將軍歸德中郎將正五品上曰定遠將軍正五品下曰寧遠將軍懷化郎將從五品上曰游騎將軍從五品下曰游擊將軍歸德郎將正六品上曰昭武校尉正六品下曰昭武副尉懷化司階從六品上曰振威校尉從六品下曰

振威副尉歸德司階正七品上曰致果校尉正七品下  
曰致果副尉懷化中候從七品上曰翊麾校尉從七品  
下曰翊麾副尉歸德中候正八品上曰宣節校尉正八  
品下曰宣節副尉懷化司戈從八品上曰禦侮校尉從  
八品下曰禦侮副尉歸德司戈正九品上曰仁勇校尉  
正九品下曰仁勇副尉懷化執戟長上從九品上曰陪  
戎校尉從九品下曰陪戎副尉歸德執戟長上自四品  
以上皆番上於兵部以遠近爲八番三月以上三千里  
外者免番輸資如文散官唯追集乃上六品以下尚書  
省送符懷化大將軍歸德大將軍配諸衛上下餘直諸

衛爲十二番皆月上忠武將軍以下游擊將軍以上每番閱疆毅者直諸衛番滿有將略者以名聞兵部主事

四人職方主事二人駕部主事二人庫部主事二人

龍朔

二年改兵部曰司戎職方曰司城駕部曰司輿庫部曰司庫光宅元年改兵部曰夏官天寶十一載曰武部駕部曰司駕有兵部令史三十人書令史六十人制書令史十三人甲庫令史十三人亭長八人掌固十二人職方令史四人書令史九人掌固四人駕部令史十人書令史二十四人掌固四人庫部令史七人書令史十五人掌固四人

職方郎中員外郎各一人掌地圖城隍鎮戍烽候防人道路之遠近及四夷歸化之事凡圖經非州縣增廢五年乃脩歲與版籍偕上凡蕃客至鴻臚訊其國山川風

土爲圖奏之副上於職方殊俗入朝者圖其容狀衣服以聞

駕部郎中員外郎各一人掌輿輦車乘傳驛廐牧馬牛雜畜之籍凡給馬者一品八匹二品六匹三品五匹四品五匹四匹六品三匹七品以下二匹給傳乘者一品十馬二品九馬三品八馬四品五品四馬六品七品二馬八品九品一馬三品以上勅召者給四馬五品三馬六品以下有差凡驛馬給地四頃時以苜蓿凡三十里有驛驛有長舉天下四方之所達爲驛千六百三十九阻險無水草鎮戍者視路要隙置官馬水驛有舟凡傳

驛馬驢每歲上其死損肥瘠之數

庫部郎中員外郎各一人掌戎器鹵簿儀仗元日冬至陳設祠祀喪葬辨其名數而供焉凡戎器色別而異處以衛尉幕士暴涼之京衛旗畫蹲獸立禽行幸則給飛走旗凡諸衛儀仗以御史涖其度掌武庫器仗則兵部長官涖其脩完京官五品以上征行者假甲纁旗幡稍諸衛給弓千牛給甲

刑部尚書一人正三品侍郎一人正四品下掌律令刑法徒隸按覆讞禁之政其屬有四一曰刑部二曰都官三曰比部四曰司門刑部郎中員外郎掌律法按覆大

理及天下奏讞爲尚書侍郎之貳凡刑法之書有四一

曰律二曰令三曰格四曰式凡鞫大獄以尚書侍郎與

御史中丞大理卿爲三司使凡國有大赦集囚徒于闕

下以聽刑部主事四人都官主事二人比部主事四人

司門主事二人

龍朔二年改刑部曰司刑都官曰司僕比部曰司計司門曰司關光宅元年改

刑部曰秋官天寶十一載改刑部曰司憲比部曰司計有刑部令史十九人書令史三十八人亭長六人掌固

十人都官令史九人書令史十二人掌固四人比部令史十四人書令史二十七人計史一人掌固四人司門

令史六人書令史十三人掌固四人

都官郎中員外郎各一人掌俘隸簿錄給衣糧醫藥而

理其訴免凡反逆相坐沒其家配官曹長役爲官奴婢

一免者一歲三番役再免爲雜戶亦曰官戶二歲五番役每番皆一月三免爲良人六十以上及廢疾者爲官戶七十爲良人每歲孟春上其籍自黃口以上印臂仲冬送於都官條其生息而按比之樂工獸醫驅馬調馬羣頭栽接之人皆取焉附貫州縣者按比如平民不番上歲督丁資爲錢一千五百丁婢中男五輸其一侍丁殘疾半輸凡居作者差以三等四歲以上爲小十一以上爲中二十以上爲丁丁奴三當二役中奴丁婢二當一役中婢三當一役

比部郎中員外郎各一人掌會內外賦歛經費俸祿



公廨勲賜贖徒役課程逋欠之物及軍資械器和糴屯收所入京師倉庫三月一比諸司諸使京都四時會於尚書省以後季句前季諸州則歲終總句焉

司門郎中員外郎各一人掌門關出入之籍及闌遺之物凡著籍月一易之流內記官爵姓名流外記年齒貌狀非遷解不除凡有名者降墨勅勘銅魚木契然後入監門校尉巡日送平安凡奏事遣官送之晝題時刻夜題更壽命婦諸親朝參者內侍監校尉涖索凡葦輦車不入宮門闌遺之物揭於門外榜以物色葢年沒官天下關二十六有上中下之差度者本司給過所出塞驗

所者給行牒獵手所過給長籍三月一易蕃客往來閱其裝重入一關者餘關不譏

工部尚書一人正三品侍郎一人正四品下掌山澤屯田工匠諸司公廨紙筆墨之事其屬有四一曰工部二曰屯田三曰虞部四曰水部工部郎中員外郎各一人掌城池土木之工役程式爲尚書侍郎之貳凡京都營繕皆下少府將作共其用役千功者先奏凡工匠以州縣爲團五人爲火五火置長一人四月至七月爲長功二月三月八月九月爲中功十月至正月爲短功雇者日爲絹三尺內中尚巧匠無作則納資凡津梁道路治

以九月工部主事三人屯田主事二人虞部主事二人

水部主事二人

武德三年改起部曰工部龍朔二年曰司平屯田曰司田虞部曰司虞水部曰

司川光宅元年改工部曰冬官天寶十一載改虞部曰司虞水部曰司水工部有令史十二人書令史二十一

人計史一人亭長六人掌固八人屯田令史七人書令史十二人計史一人掌固四人虞部令史四人書令史九人掌固四人水部令史四人書令史九人掌固四人

屯田郎中員外郎各一人掌天下屯田及京文武職田諸司公廩田以品給焉

虞部郎中員外郎各一人掌京都衢闕苑囿山澤草木及百官蕃客時蔬薪炭供頓畋獵之事每歲春以戶小兒戶婢仗內蒔種溉灌冬則謹其蒙覆凡郊祠神壇五

岳名山樵採芻牧皆有禁距墻三十步外得耕種春夏不伐木京兆河南府三百里內正月五月九月禁弋獵山澤有寶可供用者以聞

水部郎中員外郎各一人掌津濟船艦渠梁堤堰溝洫漁捕運漕碾磑之事凡坑陷井穴皆有標京畿有渠長斗門長諸州堤堰刺史縣令以時檢行而涖其決築有壞則以下戶分牽禁爭利者

唐書卷四十六

唐書卷四十六考證

百官志一兵部正三品下曰懷化將軍○舊書無  
都官六十以上及廢疾者爲官戶○舊書作蕃戶

唐書卷四十六考證

唐書卷四十七

宋翰 林學士 歐陽修 撰

志第三十七

百官志

門下省侍中二人正二品掌出納帝命相禮儀凡國家之務與中書令參總而顓判省事下之通上其制有六一曰奏鈔以支度國用授六品以下官斷流以下罪及除免官用之二曰奏彈三曰露布四曰議五曰表六曰狀白露布以上乃審其餘覆奏畫制可而授尙書省行幸則負寶以從版奏中嚴外辦還宮則請降輅解嚴皇



帝齋則請就齋室將奠則奉玉幣盥則奉匱取盤酌鬯  
水贊洗酌泛齊受虛爵進福酒皆左右其儀饗宗廟進  
瓚而贊酌鬱酒既裸贊酌醴齊籍田則奉耒四夷朝見  
則承詔勞問臨軒命使冊皇后皇太子則承詔降宣命  
慰問聘召則涖封題發驛遣使則給魚符凡官爵廢置  
刑政損益授之史官既書復涖其記注職事官六品以  
下進擬則審其稱否而進退之

武德元年改侍內曰納言三年日侍中龍朔二

年改門下省日東臺侍中日左相武后光宅元年日納言垂拱元年改門下省日鸞臺開元元年日黃門省侍

中日監天寶元年日左相

門下侍郎二人正三品掌貳侍中之職大祭祀則從盥

則奉巾旣悅奠巾奉匏爵贊獻元日冬至奏天下祥瑞

侍中闕則泣封符券給傳驛

龍朔二年改黃門侍郎曰東臺侍郎武后垂拱元年

日鸞臺侍郎天寶元年曰門下侍郎乾元元年曰黃門侍郎大歷二年復舊

左散騎常侍二人正三品下掌規諷過失侍從顧問

隋廢

散騎常侍貞觀元年復置十七年爲職事官顯慶二年分左右隸門下中書省皆金蟬珥貂左散騎與侍中爲

左貂右散騎與中書令爲右貂謂之八貂龍朔二年曰侍極

左諫議大夫四人正四品下掌諫諭得失侍從贊相武

后垂拱二年有魚保宗者上書請置匭以受四方之書

乃鑄銅匭四塗以方色列于朝堂青匭曰延恩在東告

養人勸農之事者投之丹匭曰招諫在南論時政得失

者投之白匭曰伸冤在西陳抑屈者投之黑匭曰通玄  
在北告天文祕謀者投之以諫議大夫補闕拾遺一人  
克使知匭事御史中丞侍御史一人爲理匭使其後同  
爲一匭天寶九載玄宗以匭聲近鬼改理匭使爲獻納  
使至德元年復舊寶應元年命中書門下擇正直清白  
官一人知匭以給事中中書舍人爲理匭使建中二年  
以御史中丞爲理匭使諫議大夫一人爲知匭使投匭  
者使先驗副本開成三年知匭使李中敏以爲非所以  
廣聰明而慮幽枉也乃奏罷驗副封

武德元年置諫議大夫龍朔二年日

正諫大夫貞元

四年分左右

給事中四人正五品上掌侍左右分判省事察弘文館繕寫讎校之課凡百司奏抄侍中既審則駁正違失詔勅不便者塗竄而奏還謂之塗歸季終奏駁正之目凡大事覆奏小事署而頒之三司詳決失中則裁其輕重發驛遣使則與侍郎審其事宜六品以下奏擬則校功狀殿最行藝非其人則白侍中而更焉與御史中書舍人聽天下寃滯而申理之門下省有錄事四人從七品

上主事四人從八品下

有令史二十二二人書令史四十三人甲庫令史十三人能書一

人傳制二人亭長六人掌固十四人脩補制勅匠五人裝潢一人起居郎領令史三人贊者六人武德三年改

給事郎曰給事中

左補闕六人從七品上左拾遺六人從八品上掌供奉

諷諫大事廷議小則上封事

武后垂拱元年置補闕拾遺左右各二員

起居郎二人從六品上掌錄天子起居法度天子御正殿則郎居左舍人居右有命俯陛以聽退而書之季終以授史官貞觀初以給事中諫議大夫兼知起居注或知起居事每仗下議政事起居郎一人執筆記錄于前史官隨之其後復置起居舍人分侍左右秉筆隨宰相入殿若仗在紫宸內閣則夾香案分立殿下直第二螭首和墨濡筆皆卽均處時號螭頭高宗臨朝不決事有所奏唯辭見而已許敬宗李義府爲相奏請多畏人之

知也命起居郎舍人對仗承旨仗下與百官皆出不復  
聞機務矣長壽中宰相姚璩建議仗下後宰相一人錄  
軍國政要爲時政紀月送史館然率推美讓善事非其  
實未幾亦罷而起居郎猶因制勅稍稍筆削以廣國史  
之闕起居舍人本記言之職唯編詔書不及它事開元  
初復詔修史官非供奉者皆隨仗而入位於起居郎舍  
人之次及李林甫專權又廢太和九年詔入閣日起居  
郎舍人具紙筆立螭頭下復貞觀故事

有令史三人贊  
者六人貞觀三

年置起居郎廢舍人龍朔二  
年日左史天授元年亦如之

典儀二人從九品下掌贊唱及殿中版位之次侍中版

奏中嚴外辦亦贊焉

隋謁者臺有典儀武德五年復置隸門下省

城門郎四人從六品上掌京城皇城宮殿諸門開闔之

節奉管鑰而出納之開則先外後內闔則先內後外啓

閉有時不以時則詣閣覆奏

有令史二人書令史二人武德五年置門僕八百人

番上送管鑰

符寶郎四人從六品上掌天子八寶及國之符節有事

則請於內既事則奉而藏之大朝會則奉寶進于御座

行幸則奉以從焉大事出符則藏其左而班其右以合

中外之契兼以勅書小事則降符函封使合而行之凡

命將遣使皆請旌節旌以顯賞節以顯殺

有令史二人書令史三人

主寶二人主符四人主節四人武后延載元年  
改符璽郎曰符寶郎開元元年亦曰符寶郎

弘文館學士掌詳正圖籍教授生徒朝廷制度沿革禮

儀輕重皆參議焉

武德四年置修文館于門下省九年  
改曰弘文館貞觀元年詔京官職事

五品已上子嗜書者二十四人隸館習書出禁中書法  
以授之其後又置講經博士儀鳳中置詳正學士校理  
圖籍武德後五品以上曰學士六品以上曰直學士又  
有文學直館皆它官領之武后垂拱後以宰相兼領館  
務號館主給事中一人判館事神龍元年改弘文館曰  
昭文館以避孝敬皇帝之名二年曰修文館景龍二年  
置大學士四人以象四時學士八人以象八節直學士  
十二人以象十二時景雲中減其員數復爲昭文館開  
元七年曰弘文館置校書郎又有校理讎校錯謬等官  
長慶三年與詳正學士講經博士皆罷顯以五品以上  
曰學士六品以下曰直  
學士未登朝爲直館

校書郎二人從九品上掌校理典籍刊正錯謬凡學生



教授考試如國子之制

有學生三十八人令史二人楷書十二人供進筆二人典書二人

人榻書手三人筆匠三人熟紙裝潢匠八人亭長二人掌固四人

中書省中書令二人正二品掌佐天子執大政而總判省事凡王言之制有七一曰冊書立皇后皇太子封諸王臨軒冊命則用之二曰制書大賞罰赦宥慮囚大除授則用之三曰慰勞制書褒勉贊勞則用之四曰發勅廢置州縣增減官吏發兵除免官爵授六品以上官則用之五曰勅旨百官奏請施行則用之六曰論事勅書戒約臣下則用之七曰勅牒隨事承制不易於舊則用之皆宣署申覆然後行焉大祭祀則相禮親征纂嚴則

戒飭百官臨軒冊命則讀冊若命於朝則宣授而已冊

太子則授璽綬凡制詔文章獻納以授記事之官

武德三年

改內書省曰中書省內書省曰中書令龍朔元年改中書省曰西臺中書令曰右相光宅元年改中書省曰鳳閣中書令曰內史開元元年改中書省曰紫微省中書令曰紫微令天寶元年曰右相至大歷五年紫微侍郎乃復爲中書侍郎

侍郎二人正三品掌貳令之職朝廷大政參議焉臨軒冊命爲使則持冊書授之四夷來朝則受其表疏而奏之獻贄幣則受以付有司

舍人六人正五品上掌侍進奏參議表章凡詔旨制勅璽書冊命皆起草進畫既下則署行其禁有四一曰漏

洩二曰稽緩三曰違失四曰忘誤制勅既行有誤則奏改之大朝會諸方起居則受其表狀大捷祥瑞百寮表賀亦如之冊命大臣則使持節讀冊命將帥有功及大賓客則勞問與給事中及御史三司鞠寃滯百司奏議考課皆預裁焉以久次者一人爲閣老判本省雜事又一人知制誥顓進畫給食于政事堂其餘分署制勅以六員分押尙書六曹佐宰相判案同署乃奏唯樞密遷授不預姚崇爲紫微令奏大事舍人爲商量狀與本狀皆下紫微令判二狀之是否然後乃奏開元初以它官掌詔勅策命謂之兼知制誥肅宗卽位又以它官知中

書舍人事兵興急於權便政去臺閣決遣嶺出宰相自是舍人不復押六曹之奏會昌末宰相李德裕建議臺閣常務州縣奏請復以舍人平處可否先是知制誥率用前行正郎宣宗時選尙書郎爲之主書四人從七品上主事四人從八品下

有令史二十三人書令史五十人能書四人蕃書譯語十人乘

驛二十人傳制十人亭長十八人掌固二十四人裝制勅匠一人修補制勅匠五十人掌函掌案各二十人

右散騎常侍二人右諫議大夫四人右補闕六人右拾遺六人掌如門下省

起居舍人二人從六品上掌修記言之史錄制誥德音

如記事之制季終以授國史

有楷書手四人典二人

通事舍人十六人從六品上掌朝見引納殿庭通奏凡  
近臣入侍文武就列則導其進退而贊其拜起出入之  
節蠻夷納貢皆受而進之軍出則受命勞遣既行則每  
月存問將士之家視其疾苦凱還則郊迓有令史十人  
典謁十人亭  
長十八人掌固二十四人武德四年  
廢謁者臺改通事謁者曰通事舍人

集賢殿書院學士直學士侍讀學士修撰官掌刊緝經  
籍凡圖書遺逸賢才隱滯則承旨以求之謀慮可施於  
時著述可行於世者考其學術以聞凡承旨撰集文章  
校理經籍月終則進課於內歲終則考最於外開元五  
年乾元

殿寫四部書置乾元院使有判正官四人以一人辦事  
押院中使一人掌出入宣奏領中官監守院門知書官

入人分掌四庫書六年乾元院更號麗正修書院置使  
及檢校官改修書官爲麗正殿直學士八年加文學直  
又加修撰校理刊正校勘官十一年置麗正院修書學  
士光順門外亦置書院十二年東都明福門外亦置麗  
正書院十三年改麗正修書院爲集賢殿書院五品以  
上爲學士六品以下爲直學士宰相一人爲學士知院  
事常侍一人爲副知院事又置判院一人押院中使一  
人玄宗嘗選耆儒日一人侍讀以質史籍疑義至是置  
集賢院侍講學士侍讀直學士其後又增修撰官校理  
官待制官留院官知檢討官文學直之員募能書者爲  
書直及寫御書人其後亦以前資常選三衛散官五品  
以上子孫爲之又置畫直至十九年以書直畫直榻書  
有官者爲直院至德二年置大學士貞元初置編錄官  
四年罷大學士八年罷校理置校書四人正字二人元  
和二年復置集賢校理罷校書正字四年集賢御書院  
學士直學士皆用五品如開元故事以學士一人年高  
者判院事非登朝官者爲校理餘皆罷初太宗卽位命  
京官五品以上更宿中書門下兩省以備訪問永徽中  
命弘文館學士一人日待制于武德殿西門文明元年  
詔京官五品以上清官日一人待制于章善明福門先

天末又命朝集使六品以上二人隨仗待制永泰時勳臣罷節制無職事皆待制于集賢門凡十三人崔祐甫為相建議文官一品以上更直待制其後著令正衙待制官日二人

校書四人正九品下正字二人從九品上

有中使一人孔目官一人

專知御書檢討八人知書官八人書直寫御書手九十人畫直六人裝書直十四人造筆直四人榻書六人典人

史館修撰四人掌修國史

貞觀三年置史館於門下省以它官兼領或卑位有才者

亦以直館稱以宰相滋修撰又於中書省置祕書內省修五代史開元二十年李林甫以宰相監修國史建議以為中書切密之地史官記事隸門下省疏遠於是諫議大夫史館修撰尹愔奏徙于中書省天寶後它官兼史職者曰史館修撰初入為直館元和六年宰相裴瑒建議登朝官領史職者為修撰以官高一判館事未登朝官皆為直館大中八年廢史館直館二員增修撰四人分掌四季有令史二人楷書十二人寫國史楷書

十八人楷書手二十五人典書二人  
亭長二人掌固四人熟紙匠六人

祕書省監一人從三品少監二人從四品上丞一人從

五品上監掌經籍圖書之事領著作局少監爲之貳武德

四年改少令曰少監龍朔二年改祕書省曰蘭臺監曰太史少監曰侍郎丞曰大夫祕書郎曰蘭臺郎武后垂拱元年祕書省曰麟臺太極元年曰祕書省有典書四人楷書十人令史四人書令史九人亭長六人掌固八人熟紙匠十人裝滿匠十人筆匠六人

祕書郎三人從六品上掌四部圖籍以甲乙丙丁爲部  
皆有三本一曰正二曰副三曰貯凡課寫功程皆分判  
校書郎十人正九品上正字四人正九品下掌讎校典  
籍刊正文章



著作局郎二人從五品上著作佐郎二人從六品上校

書郎二人正九品上正字二人正九品下著作郎掌撰

碑誌祝文祭文與佐郎分判局事

武德四年改著作曹曰局龍朔元年曰司

文局郎曰郎中佐郎曰司文郎有楷書五人書令史一人書吏二人掌固四人

司天臺監一人正三品少監二人正四品上丞一人正

六品上主簿二人正七品上主事一人正八品下監掌

察天文稽歷數凡日月星辰風雲氣色之異率其屬而

占有通玄院以藝學召至京師者居之凡天文圖書器

物非其任不得與焉每季錄祥眚送門下中書省紀于

起居注歲終上送史館歲頒歷于天下

武德四年改太史監曰太史局

隸祕書省七年廢監候龍朔二年改太史局曰祕書閣  
局令曰祕書閣郎中武后光宅元年改太史局曰渾天  
監不隸麟臺俄改曰渾儀監置副監及丞主簿改司辰  
師曰司辰長安二年渾儀監復曰太史局廢副監及丞  
隸麟臺如故改天文博士曰靈臺郎歷博士曰保章正  
景龍二年改太史局曰太史監不隸祕書省復置丞景  
雲元年又爲局隸祕書省踰月爲監歲中復爲局二年  
改曰渾儀監開元二年復曰太史監改令爲監置少監  
十四年太史監復爲局以監爲令而廢少監天寶元年  
太史局復爲監自是不隸祕書省乾元元年曰司天臺  
藝術人韓穎劉恒建議改令爲監置通玄院及主簿置  
五官監候及五官禮生十五人掌布諸壇神位五官楷  
書手五人掌寫御書有令史五人天文觀生九十人天  
文生五十人歷生五十五人初有天文博士二人正八  
品下歷博士一人從八品上司辰師五人正九品下裝  
書歷生掌候天文掌教習天文氣色掌寫御歷後皆省

春官夏官秋官冬官中官正各一人正五品上副正各

一人正六品上掌司四時各司其方之變異冠加一星

珠以應五緯衣從其方色元日冬至朔望朝會及大禮

各奏方事而服以朝見

乾元三年置五官正及副正

五官保章正二人從七品上五官監候三人正八品下  
五官司歷二人從八品上掌曆法及測景分至表準

五官靈臺郎各一人正七品下掌候天文之變五官挈  
壺正二人正八品上五官司辰八人正九品上漏刻博

士六人從九品下掌知漏刻凡孔壺爲漏浮箭爲刻以

考中星昏明更以擊鼓爲節點以擊鐘爲節

武后長安二年置挈

壺正乾元元年與靈臺郎保章正司歷司辰皆加五官之名有漏刻生四十八人典鐘典鼓三百五十人初有刻漏視品刻漏典事掌知刻漏檢校刻漏後皆省

殿中省監一人從三品少監二人從四品上丞二人從五品上監掌天子服御之事其屬有六局曰尙食尙藥尙衣尙乘尙舍尙輦少監爲之貳凡聽朝率屬執繖扇列于左右大朝會祭祀則進爵行幸則侍奉仗內驂乘百司皆納印而藏之大事聽焉有行從百司之印左右仗廡左曰奔星右曰內駒兩仗內又有六廡一曰左飛二曰右飛三曰左萬四曰右萬五曰東南內六曰西南內園苑有官馬坊每歲河隴羣牧進其良者以供御六閑馬以殿中監及尙乘主之武后萬歲通天元年置仗內六閑一曰飛龍二曰祥麟三曰鳳苑四曰鸞鸞五曰

吉良六日六羣亦號六廐以殿中丞檢校仗內閑廐以  
中官爲內飛龍使聖歷中置閑廐使以殿中監承恩遇  
者爲之分領殿中太僕之事而專掌輿輦牛馬自是宴  
游供奉殿中監皆不豫開元初閑廐馬至萬餘匹駱駝  
巨象皆養焉以駝馬隸閑廐而尙乘局名存而已閑廐  
使押五坊以供時狩一曰鷓坊二曰鶻坊三曰鷦坊四  
曰鷹坊五曰狗坊侍御尙醫二人正六品上主事二人  
從九品上

武德元年改殿內監曰殿中省龍朔二年曰  
中御府監曰大監丞曰大夫有令史四人書

令史十二人左右仗千牛各十人掌固亭  
長各八人舊有天藏府開元二十二年省

進馬五人正七品上掌大陳設戎服執鞭居立仗馬之

左視馬進退

天寶八載罷南衙立仗馬因省進馬十二載復置乾元後又省大歷十四年復

尚食局奉御二人正五品下直長五人正七品上諸奉御直長品皆如之食醫八人正九品下奉御掌儲供直

長爲之貳進御必辨時禁先嘗之饗百官賓客則與光

祿視品秩而供凡諸陵月享視膳乃獻

龍朔二年改尚食局日奉膳局

諸局奉御皆日大夫有書令史二人書吏五人主食十六人主膳八百四十人掌固八人

尚藥局奉御二人直長二人掌和御藥診視凡藥供御中書門下長官及諸衛上將軍各一人與監奉御涖之藥成醫佐以上先嘗疏本方具歲月日涖者署奏餌日奉御先嘗殿中監次之皇太子又次之然後進御太常

每季閱送上藥而還其朽腐者左右羽林軍給藥飛騎

萬騎病者頒焉

龍朔二年改尙藥局日奉醫局有按摩師四人呪禁師四人書令史二人書吏

四人直官十人主藥十二人藥童三十人合口脂匠一人掌固四人

侍御醫四人從六品上掌供奉診候

司醫五人正八品下醫佐十人正九品下掌分療衆疾

皆貞觀中置

尙衣局奉御二人直長四人掌供冕服几案祭祀則奉

鎮圭於監而進于天子大朝會設案

龍朔二年改尙衣局日奉冕局有書

令史三人書吏四人主衣十六人掌固四人

尙舍局奉御二人直長六人掌殿庭祭祀張設湯沐燈

燭汎掃行幸則設三部帳幕有古帳大帳次帳小次帳

小帳凡五等各三部其外則蔽以排城大朝會設黼辰

施躡席薰鑪湖望設幄而已

龍朔二年改尚舍局曰奉辰局有書令史三人書吏

七人掌固十人幕士八十人舊有給使百二十人掌供御湯沐燈燭雜使貞觀中省

尚乘局奉御二人直長十人掌內外閑廐之馬左右六

閑一曰飛黃二曰吉良三曰龍媒四曰騊駼五曰馱驪

六曰天苑凡外牧歲進良馬印以三花飛鳳之字飛龍

廐日以八馬列宮門之外號南衙立仗馬仗下乃退大

陳設則居樂縣之北與象相次

龍朔二年改尚乘局曰奉駕局有書令史六人

書吏十四人直官二十人習馭五百人掌閑五千人典事五人獸醫七十人掌固四人習馭掌調六閑之馬掌



開掌飼六閑之馬治其乘具鞍轡典事掌六閑  
閑忽栗太宗置司廩司庫高宗置習馭獸醫

司廩司庫各一人正九品下掌六閑藁秸出納奉乘十  
八人正九品下掌飼習御馬

尙輦局奉御二人直長三人尙輦二人正九品下掌輿  
輦繖扇大朝會則陳于庭大祭祀則陳于廟皆繖二翰  
一扇一百五十有六既事而藏之常朝則去扇左右留

者三

龍朔二年改尙輦局曰奉舉局有書令史二人書吏四人七輦主輦各六人掌扇六十八人掌翰三十

人掌輦四十二人奉舉十五人掌固六人掌扇掌翰掌執繖扇紙筆硯雜供奉之事掌輦掌率主輦以供其事

高宗置掌翰

內侍省監二人從三品少監二人內侍四人皆從四品

上監掌內侍奉宣制令其屬六局曰掖庭宮闈奚官內  
僕內府內坊少監內侍爲之貳皇后親蠶則升壇執儀  
大駕出入爲夾引

武德四年改長秋監曰內侍監內承奉曰內常侍內承直曰內給事龍朔

二年改監爲省武后垂拱元年曰司宮臺天寶十三年置內侍監改內侍曰少監尋更置內侍有高品一千六百九十六人品官白身二千九百三十二人令史八人書令史十六人

內常侍六人正五品下通判省事

內給事十人從五品下掌承旨勞問分判省事凡元日冬至百官賀皇后則出入宣傳宮人衣服費用則具品秩計其多少春秋宣送于中書主事二人從九品下內謁者監十人正六品下掌儀法宣奏承勅令及外命

婦名帳凡諸親命婦朝會者籍其數上內侍省命婦下

車則導至朝堂奏聞

唐廢內謁者局置內典引十八人掌諸親命婦朝參出入導引有內

亭長六人掌固八人

內謁者十二人從八品下掌諸親命婦朝集班位分泣

諸門

內寺伯六人正七品下掌糾察宮內不法歲饑則莅出

入

寺人六人從七品下掌皇后出入執御刀冗從

掖庭局令二人從七品下丞三人從八品下掌宮人簿

帳女工凡宮人名籍司其除附公桑養蠶會其課業供

奉物皆取焉婦人以罪配没工縫巧者隸之無技能者

隸司農諸司營作須女功者取於戶婢

有書令史四人書吏八人計史

二人典事十人掌固  
四人計史掌料工程

宮教博士二人從九品下掌教習宮人書算衆藝

初內文學

館隸中書省以儒學者一人爲學士掌教宮人武后如意元年改曰習藝館又改曰萬林內教坊尋復舊有內教博士十八人經學五人史子集綴文三人楷書二人莊老太一篆書律令吟詠飛白書并碁各一人開元末館廢以內教博士以下隸內侍省中官爲之

監作四人從九品下掌監涖雜作典工役

官闈局令二人從七品下丞二人從八品下掌侍宮闈

出入管籥凡享太廟皇后神主出入則帥其屬輿之總

小給使學生之籍給以糧稟

有書令史三人書吏六人內關史二十八人內掌扇十

六人內給使無常員小給使學生五十人掌固四人凡無官品者號曰內給使掌諸門進物之歷內關史掌承傳諸門出納管籥內

掌扇掌中宮繳扇

奚官局令二人正八品下丞二人正九品下掌奚隸工役宮官之品宮人病則供醫藥死給衣服各視其品陪陵而葬者將作給匠戶衛士營冢三品葬給百人四品八十人五品六十人六品七品十人八品九品七人無品者斂以松棺五釘葬以犢車給三人皆監門校尉直長泣之內命婦五品以上無親戚者以近冢同姓中男一人主祭于墓無同姓者春秋祠以少牢

有書令史三人書吏六人

典事案直掌

固各四人

內僕局令三人正八品下丞二人正九品下掌中宮車

乘皇后出則令居左丞居右夾引有書令史二人書吏四人駕士百四十人

典事八人掌固八人駕士掌習御車輿雜畜

內府局令二人正八品下丞二人正九品下掌中藏寶

貨給納之數及供燈燭湯沐張設凡朝會五品已上及

有功將士蕃酋辭還皆賜於庭有書令史二人書吏典史掌固各四人典事六

人

太子內坊局令二人從五品下丞二人從七品下掌東

宮閣內及宮人糧稟坊事五人從八品下初內坊隸東宮開元二十

七年隸內侍省爲局改典內日令置丞坊事及導客舍  
人六人掌序導賓客閣帥六人掌帥閤人內給使以供  
其事內閤人八人掌承諸門出入管籥內織扇燈燭內  
殿尉二人掌車乘有錄事一人令史三人書令史五人  
典事二人駕士三十  
人亭長掌固各二人

典直四人正九品下掌宮內儀式導引通傳勞問糾劾  
非違察出納

內官貴妃惠妃麗妃華妃各一人正一品掌佐皇后論

婦禮於內無所不統唐因隋制有貴妃淑妃德妃賢妃  
各一人爲夫人正一品昭儀昭容

昭媛修儀修容修媛克儀克容克媛各一人爲九嬪正

二品婕妤九人正三品美人四人正四品才人五人正

五品寶林二十七人正六品御女二十七人正七品采  
女二十七人正八品六尚亦日諸尚書正三品二十四  
司亦日諸司事正四品二十四典亦日諸典事正六品  
二十四掌亦日諸掌事龍朔二年置贊德二人正一品

宣儀四人正二品承闈五人正四品承旨五人正五品  
衛仙六人正六品供奉八人正七品侍櫛二十人正八  
品侍巾三十人正九品咸亨復舊開元中玄宗以后妃  
四星一爲后而有后而復置四妃非典法乃置惠妃麗妃  
華妃以代三夫人又置六儀美人才人增尙宮尙儀尙  
服三局諸司諸典自六品至九品而止其後復置貴妃  
淑儀德儀賢儀順儀婉儀芳儀各一人正二品掌教九  
御四德率其屬以贊后禮

美人四人正三品掌率女官修祭祀賓客之事  
才人七人正四品掌敘燕寢理絲枲以獻歲功

宮官尙宮局尙宮二人正五品六尙皆如之掌導引中  
宮總司記司言司簿司闈凡六尙事物出納文籍皆泣

其印署

有女史六人  
掌執文書



司記二人正六品二十四司皆如之掌宮內文簿入出錄爲抄目審付行焉牒狀無違然後加印典記佐之典記二人正七品二十四典皆如之

掌記二人正八品二十四掌皆如之

司言典言各二人掌承勅宣付別鈔以授司闈傳外

掌言二人掌宣傳外司附奏受事者奏聞承勅處分則

錄所奏爲案記

有女史四人

司簿典簿掌簿各二人掌女史以上名簿稟賜則品別

條錄爲等

有女史六人

司闈六人掌諸閣管鑰

典闈掌闈各六人掌分洩啓閉

有女史  
四人

尙儀局尙儀二人掌禮儀起居總司籍司樂司賓司贊  
司籍典籍掌籍各二人掌供御經籍分四部部別爲目  
以時暴涼教學則簿記課業供奉几案紙筆皆預侍焉

有女史  
十人

司樂典樂掌樂各四人掌宮縣及諸樂陳布之儀洩其

閱習

有女史  
二人

司賓典賓掌賓各二人掌賓客朝見受名以聞宴會則

具品數以授尙食有賜物與尙功洩給

有女史  
二人

司贊典贊掌贊各二人掌賓客朝見宴食贊相導引會

日引客立于殿庭司言宣勅坐然後引卽席酒至起再拜食至亦起皆相其儀

彤史二人正六品

有女史二人

尙服局尙服二人掌供服用采章之數總司寶司衣司飾司仗

司寶二人掌神寶受命寶六寶及符契皆識其行用記以文簿

典寶掌寶各二人凡出付皆旬別案記還則朱書注入

有女史四人

司衣典衣掌衣各二人掌宮內御服首飾整比以時進

奉

有女史  
四人

司飾典飾掌飾各二人掌湯沐巾櫛凡供進識其寒溫

之節

有女史  
二人

司仗典仗掌仗各二人掌仗衛之器凡立儀衛尙服率

司仗等供其事

有女史  
二人

尙食局尙食二人掌供膳羞品齊總司膳司醢司藥司  
饈凡進食先嘗

司膳二人掌烹煎及膳羞米麩薪炭凡供奉口味皆種  
別封印

典膳掌膳各四人掌調和御食溫涼寒熱以時供進則

嘗之

有女史  
四人

司醞典醞掌醞各二人掌酒醴醢飲以時進御

有女史  
二人

司藥典藥掌藥各二人掌醫方凡藥外進者簿案種別

有女史

二人

司饔典饔掌饔各二人掌給宮人餼食薪炭皆有等級

受付則旬別案記

有女史  
四人

尙寢局尙寢二人掌燕見進御之次敘總司設司輿司

苑司燈

司設典設掌設各二人掌牀帷茵席鋪設久故者以狀

聞凡汛掃之事典設以下分視

有女史  
四人

司輿典輿掌輿各二人掌輿輦繖扇文物羽旄以時暴

涼典輿以下分察

有女史二人

司苑典苑掌苑各二人掌園苑時植蔬果典苑以下分

察之果熟進御

有女史二人

司燈典燈掌燈各二人掌門閣燈燭晝漏盡一刻典燈

以下分察

有女史二人

尙功局尙功二人掌女功之程總司製司珍司綵司計

司製典製掌製各二人掌供御衣服裁縫

有女史二人

司珍典珍掌珍各二人掌珠珍錢貨

有女史六人

司綵典綵掌綵各二人掌錦綵縑帛絲枲有賜用則旬

別案記

有女史二人

司計典計掌計各二人給衣服飲食薪炭

有女史二人

宮正一人正五品司正二人正六品典正二人正七品

宮正掌戒令糾禁謫罰之事宮人不供職者司正以牒

取裁小事決罰大事奏聞

有女史四人阿監副監視七品

太子內官良娣二人正三品良媛六人正四品承徽十人正五品昭訓十六人正七品奉儀二十四人正九品司閨二人從六品三司皆如之掌導引妃及宮人名簿總掌正掌書掌筵

掌正三人從八品九掌皆如之掌文書出入管鑰糾察

推罰

有女史  
三人

掌書三人掌符契經籍宣傳啓奏教學稟賜紙筆

有女史三人

人

掌筵三人掌幄帟牀褥几案輿織汎掃鋪設

司則二人掌禮儀參見總掌嚴掌縫掌藏

掌嚴三人掌首飾衣服巾櫛膏沐服玩仗衛

有女史三人

掌縫三人掌裁紉織績

有女史  
三人

掌藏三人掌財貨珠寶縑絲

司饌二人掌進食先嘗總掌食掌醫掌園

有女史  
四人

掌食三人掌膳羞酒醴燈燭薪炭器皿

有女史  
四人



掌醫三人掌方藥優樂

有女史二人

掌園三人掌種植蔬果

有女史一人

唐書卷四十七

唐書卷四十七考證

百官志二內侍省監二人從三品○舊書作正三品

唐書卷四十七考證

唐書卷四十八

宋翰林學士歐陽修撰

志第三十八

百官志

御史臺大夫一人正三品中丞三人正四品下大夫掌以刑法典章糾正百官之罪惡中丞爲之貳其屬有三院一曰臺院侍御史隸焉二曰殿院殿中侍御史隸焉三曰察院監察御史隸焉凡寃而無告者三司詰之三司謂御史大夫中書門下也大事奏裁小事專達凡有彈劾御史以白大夫大事以方幅小事署名而已有制

覆囚則與刑部尚書平閱行幸乘輅車爲導朝會則率其屬正百官之班序遲明列於兩觀監察御史二人押班侍御史顓舉不如法者文武官職事九品以上及二王後朝朔望文官五品以上及兩省供奉官監察御史員外郎太常博士日參號常參官武官三品以上三日一朝號九參官五品以上及折衝當番者五日一朝號六參官弘文崇文館國子監學生四時參凡諸王入朝及以恩追至者日參九品以上自十月至二月袴褶以朝五品以上有珂蕃官及四品非清官則否凡朝位以官職事同者先爵爵同以齒致仕官居上職事與散官

勳官合班則文散官居職事之下武散官次之勳官又次之官同者異姓爲後親王嗣王任文武官者從其班官卑者從王品郡王任三品以下職事者居同階品之上非任文武官者嗣王居太子太保之下郡王次之國公居三品之下郡公居從三品之下縣公居四品之下侯居從四品之下伯居五品之下子居從五品之上男居從五品之下以前官召見者居本品見任之上以理解者居本品之下本司參集者以職事爲上下文武三品非職事官者朝參名簿皆稱曰諸公凡出不踰四面關則不辭見都督刺史都護旣辭候旨於側門左右僕

射侍中中書令初拜以表讓中書門下五品以上及諸

司長官謝於正衙復進狀謝於側門兩班三品以朔望

朝就食廊下殿中侍御史二人爲使涖之

高宗改治書侍御史中丞

以避帝名龍朔二年改御史臺曰憲臺大夫曰大司憲  
中丞曰司憲大夫武后文明元年改御史臺曰肅政臺  
光宅元年分左右臺左臺知百司監軍旅右臺察州縣  
省風俗尋命左臺兼察州縣兩臺歲再發使八人春日  
風俗秋曰廉察以四十八條察州縣兩臺御史有假有  
檢校有員外有試至神龍初皆廢景雲三年以兩臺望  
齊糾舉苛察百僚厭其煩乃廢右臺延和元年復置歲  
中以尚書省隸左臺月餘而右臺復廢至德後諸道使  
府參佐皆以御史爲之謂之外臺復有檢校裏行內供  
奉或兼或攝諸使下官亦如之會昌初升大夫中丞品  
東都留臺有中丞一人侍御史一人殿中侍御史二人  
監察御史三人元和後不置中丞以侍御史殿中侍御  
史監察御史主留臺務  
而三院御史亦不常備

侍御史六人從六品下掌糾舉百寮及入閣承詔知推  
彈雜事凡三司理事與給事中中書舍人更直朝堂若  
三司所按而非其長官則與刑部郎中員外郎大理司  
直評事往訊彈劾則大夫中丞押奏大事法冠朱衣纁  
裳白紗中單小事常服久次者一人知雜事謂之雜端  
殿中監察職掌進名遷改及令史考第臺內事額決亦  
號臺端次一人知公廨次一人知彈分京城諸司及諸  
州爲東西次一人知西推贓贖三司受事號副端次一  
人知東推理匭等有不糾舉者罰之以殿中侍御史第  
一人同知東推蒞太倉出納第一人同知西推蒞左藏



出納號四推御史隻日臺院受事隻日殿院受事次侍御史一人分司東都臺凡御史以下遇長官於路去戴下馬長官斂轡止之出入行止殿中以下視以爲法先後有罰入朝則與殿中侍御史隨仗分入東則居侍中黃門侍郎給事中之次西則居中書令侍郎舍人之次各居中丞大夫下每一人東嚮承詔五日有旨召御史不呼名則承詔者出樂彥瑋爲大夫以嘗召兩御史乃加副承詔一人闕則殿中丞乏監察御史分日直朝堂入自側門非奏事不至殿庭正門無籍天授中詔側門置籍得至殿庭開元七年又詔隨仗入閣分左右巡糾

察違失左巡知京城內右巡知京城外盡雍洛二州之境月一代將晦卽巡刑部大理東西徒坊金吾縣獄蒐狩則監圍察斷絕失禽者其後以殿中掌左右巡尋以務劇選用京畿縣尉又置御史裏行使侍御史裏行使殿中裏行使監察裏行使以未爲正官無員數唐法殿中侍御史遷拜及職事與侍御史鈞開元以降權屬侍御史而殿中兼知庫藏宮門內事故事御史臺不受訟有訴可聞者略其姓名託以風聞其後御史嫉惡者少通狀壅絕十四年乃定授事御史一人知其日劾狀題告事人姓名其後宰相以御史權重建議彈奏先白中

丞大夫復通狀中書門下然後得奏自是御史之任輕矣建中元年以侍御史分掌公廨推彈自是雜端之任輕矣元和八年命四推御史受事周而復始罷東西分口之限隋末廢殿內侍御史義寧元年丞相府置察吏掾二人武德元年改曰殿中侍御史龍朔元年置監察御史裏行武后文明元年置殿中裏行後亦顯以裏行各官長安二年置內供奉

主簿一人從七品下掌印受事發辰覈臺務主公廨及

戶奴婢勳散官之職錄事二人從九品下有主事二人臺院有令史

七十八人書令史二十五人亭長六人掌固十一人殿院有令史八人書令史十八人察院有計史二十四人

令史十人掌固十二人

殿中侍御史九人從七品下掌殿庭供奉之儀京畿諸

州兵皆隸焉正班列於閣門之外糾離班語不肅者元  
日冬至朝會則乘馬具服戴黑豸升殿巡幸則往來門  
旗之內檢校文物虧失者一人同知東推監太倉出納  
二人同知西推監左藏出納二人爲廊下食使二人分  
知左右巡三人內供奉

監察御史十五人正八品下掌分察百寮巡按州縣獄  
訟軍戎祭祀營作太府出納皆莅焉知朝堂左右廂及  
百司綱目凡十道巡按以判官二人爲佐務繁則有支  
使其一察官人善惡其二察戶口流散籍帳隱沒賦役  
不均其三察農桑不勤倉庫減耗其四察妖猾盜賊不

事生業爲私蠹害其五察德行孝悌茂才異等藏器晦跡應時用者其六察黠吏豪宗兼并縱暴貧弱冤苦不能自申者凡戰伐大克獲則數俘馘審功賞然後奏之屯田鑄錢嶺南黔府選補亦視功過糾察決囚徒則與中書舍人金吾將軍莅之國忌齋則與殿中侍御史分察寺觀莅宴射習射及大祠中祠視不如儀者以聞初開元中兼巡傳驛至二十五年以監察御史檢校兩京館驛大歷十四年兩京以御史一人知館驛號館驛使監察御史分察尚書省六司繇下第一人爲始出使亦然興元元年以第一人察吏部禮部兼監察使第二人

察兵部工部兼館驛使第三人察戶部刑部歲終議殿  
最元和中以新人不出使無以觀能否乃命顓察尚書  
省號曰六察官開元十九年以監察御史二人莅太倉  
左藏庫三院御史皆初領繁劇外府推事其後以殿中  
侍御史上一人爲監太倉使第二人爲監左藏庫使凡  
諸使下三院御史內供奉其班居正臺監察御史之上  
太常寺卿一人正三品少卿二人正四品上掌禮樂郊  
廟社稷之事總郊社太樂鼓吹太醫太卜廩犧諸祠廟  
等署少卿爲之貳凡大禮則贊引有司攝事則爲亞獻  
三公行園陵則爲副大祭祀省牲器則謁者爲之導小

祀及公卿嘉禮命謁者贊相凡巡幸出師克獲皆擇日  
告太廟凡藏大享之器服有四院一日天府院藏瑞應  
及伐國所獲之寶禘祫則陳于廟庭二日御衣院藏天  
子祭服三日樂縣院藏六樂之器四日神厨院藏御廩  
及諸器官奴婢初有衣冠署令正八品上貞觀元年署  
廢高宗卽位改治禮郎曰奉禮郎以避  
帝名龍朔二年改太常寺曰奉常寺九寺卿皆曰正卿  
少卿曰大夫武后光宅元年復改太常寺曰司常寺  
丞二人從五品下掌判寺事凡享太廟則脩七祀于西  
門之內主簿二人從七品上

博士四人從七品上掌辨五禮按王公三品以上功過  
善惡爲之諡大禮則贊卿導引

大祝六人正九品上掌出納神主祭祀則跪讀祝文卿省牲則循牲告充牽以授太官

奉禮郎二人從九品上掌君臣版位以奉朝會祭祀之禮宗廟則設皇帝位於庭九廟子孫列焉昭穆異位去爵從齒凡樽彝勺罍篚坫簠簋登鉶籩豆皆辨其位凡祭祀朝會在位拜跪之節皆贊導之公卿巡行諸陵則主其威儀鼓吹而相其禮

協律郎二人正八品上掌和律呂錄事二人從九品上

八寺錄事品同

有禮院脩撰檢討官各一人府十一人史二十三人謁者十人贊引二十人贊

者四人祝史六人贊者十六人太常寺禮院禮生各三十五人亭長八人掌固十二人



兩京郊社署令各一人從七品下丞各一人從八品上

令掌五郊社稷明堂之位與奉禮郎設樽罍篚冪而太

官令實之立燎壇積柴合朔有變則巡察四門以俟變

過明則罷

有府二人史四人典事五人掌固五人門僕八人齋郎百一十八人齋郎掌供郊廟之役太

廟九室室有長三人以主樽罍篚冪鑰又有罍洗二人郊壇有掌座二十四人以主神御之物皆禮部奏補

凡室長十年掌座十二年皆授官祭饗而員少兼取三館學生皆絳衣絳幘更一番者戶部下蜀符歲一申考

諸署所擇者太常以十月中解於禮部如貢舉法帖論語及一大經中第者錄奏吏部注冬集散官否者番上

如初六試而絀授散官唐初以郊社太樂鼓吹太醫太官左藏乘黃典廐典客上林太倉平準常平典牧左尚

右尚爲上署鉤盾右藏織染掌治爲中署珍羞良醞掌醞守官武器車府司儀崇立導官甄官河渠弩坊甲坊

舟楫太卜廩犧中校左校右校爲下署

大樂署令二人從七品下丞一人從八品下樂正八人  
從九品下令掌調鐘律以供祭饗凡習樂立師以教而  
歲考其師之課業爲三等以上禮部十年大校未成則  
五年而校以番上下有故及不任供奉則輸資錢以充  
伎衣樂器之用散樂閏月人出資錢百六十長上者復  
繇役音聲人納資者歲錢二千博士教之功多者爲上  
第功少者爲中第不勤者爲下第禮部覆之十五年有  
五上考七中考者授散官直本司年滿考少者不敘教  
長上弟子四考難色二人次難色二人業成者進考得  
難曲五十以上任供奉者爲業成習難色大部伎三年

而成次部二年而成易色小部伎一年而成皆入等第

三爲業成業成行脩謹者爲助教博士缺以次補之長

上及別教未得十曲給資三之一不成者隸鼓吹署習

大小橫吹難色四番而成易色三番而成不成者博士

有謫內教博士及弟子長教者給資錢而留之武德後

置內教坊于禁中武后如意元年改曰雲韶府以中官

爲使開元二年又置內教坊于蓬萊宮側有音聲博士

第一曹博士第二曹博士京都置左右教坊掌俳優雜

技自是不隸太常以中官爲教坊使

唐改太常爲樂正有府三人史六人

典事八人掌固六人文武二舞郎一百四十人散樂二百八十二人仗內散樂一千人音聲人一萬二十七人

有別教院開成三年改  
法曲所處院曰仙韶院

鼓吹署令二人從七品下丞二人從八品下樂正四人  
從九品下令掌鼓吹之節合朔有變則帥工人設五鼓  
于太社執麾旒于四門之塾置龍牀有變則舉麾擊鼓  
變復而止馬射設擗鼓金鉦施龍牀大儼帥鼓角以助  
偃子之唱

有府三人史六人典事四人掌固四人  
人唐并清商鼓吹爲一署增令一人

太醫署令二人從七品下丞二人醫監四人並從八品  
下醫正八人從九品下令掌醫療之法其屬有四一曰  
醫師二曰針師三曰按摩師四曰呪禁師皆教以博士  
考試登用如國子監醫師醫正醫工療病書其全之多

少爲考課歲給藥以防民疾凡陵寢廟皆儲以藥尚藥  
太常醫各一人受之宮人患坊有藥庫監門莅出給醫  
師醫監醫正番別一人莅坊凡課藥之州置採藥師一  
人京師以良田爲園庶人十六以上爲藥園生業成者

爲師凡藥辨其所出擇其良者進焉

有府二人史四人  
主藥八人藥童二

十四人藥園師二人藥園生八人掌固四人醫師二十  
人醫工百人醫生四十人典藥一人針工三十人針生  
二十人按摩工五十六人按摩生十五人  
呪禁師二人呪禁工八人呪禁生十人

醫博士一人正八品上助教一人從九品上掌教授諸  
生以本草甲乙脉經分而爲業一曰體療二曰瘡腫三  
曰少小四曰耳目口齒五曰角法

針博士一人從八品上助教一人針師十人並從九品下掌教針生以經脉孔穴教如醫生

按摩博士一人按摩師四人並從九品下掌教導引之法以除疾損傷折跌者正之

呪禁博士一人從九品下掌教呪禁被除爲厲者齋戒以受焉

太卜署令一人從七品下丞二人從八品下卜正博士各二人從九品下掌卜筮之法一曰龜二曰五兆三曰易四曰式祭祀大事率卜正卜日示高於卿退而命龜旣灼而占先上旬次中甸次下甸小祀小事者則卜正

示高命龜作而太卜令佐莅之季冬帥偃子堂贈大儺

天子六隊太子二隊方相氏右執戈左執楯而導之唱

十二神名以逐惡鬼儺者出磔雄雞于宮門城門有卜助教

二人卜師二十人巫師十五人卜筮生四十五人府一人史二人掌固二人

廩犧署令一人從八品下丞二人正九品下掌犧牲粢

盛之事祀用太牢者三牲加酒脯醢與太祝牽牲就榜

位卿省牲則北面告牖以授太官籍田則供耒于司農

卿卿以授侍中籍田所收以供粢盛五齊三酒之用以

餘及橐飼犧牲有府一人史二人典事二人掌固二人

汾祠署令一人從七品下丞一人從八品上掌享祭灑

掃之制

有府二人史四人廟幹二人開元二十一年置署

三皇五帝以前帝王三皇五帝周文王周武王漢高祖  
兩京武成王廟令一人從六品下丞一人正八品下掌

開闔灑掃釋奠之禮

有錄事一人府二人史四人廟幹二人掌固四人門僕八人神龍二

年兩京置齊太公廟署其後廢開元十九年復置天寶  
三載初置周文王廟署六載置三皇五帝廟署七載置  
三皇五帝以前帝王廟署九載置周武王漢高祖廟署  
上元元年改齊太公署爲武成王廟署朱全忠曰武明

光祿寺卿一人從三品少卿二人從四品上丞二人從

六品上主簿一人從七品上掌酒醴膳羞之政總大官

珍羞良醞掌醢四署凡祭祀省牲饗濯漑三公攝祭則

爲終獻朝會享則節其等差錄事二人

龍朔二年改光祿寺曰司宰寺



武后光宅元年日司膳寺有府十一人吏二十人亭長六人掌固六人

太官署令二人從七品下丞四人從八品下掌供祠宴

朝會膳食祭日令白卿詣厨省牲鑊取明水明火帥宰

人割牲取毛血實豆遂烹又實簠簋設于饌幕之內有府

四人史八人監膳十人監膳史十人供膳二千四百人掌固四人

珍羞署令一人正八品下丞二人正九品下掌供祭祀

朝會賓客之庶羞榛栗脯脩魚鹽菱芡之名數武后垂拱元年

改肴藏署曰珍羞署神龍元年復舊開元元年又改有府三人史六人典書八人錫匠五人掌固四人

良醞署令二人正八品下丞二人正九品下掌供五齊

三酒享太廟則供鬱鬯以實六彝進御則供春暴秋清

醑醢桑落之酒

有府三人史六人監事二人掌醑二十四人酒匠十三人奉鱗百二十人掌固四人

人

掌醢署令一人正八品下丞二人正九品下掌供醢醢

之物一曰鹿醢二曰兔醢三曰羊醢四曰魚醢宗廟用

菹以實豆賓客百官用醢醬以和羹

有府二人史二人主醢十人醬匠二

十三人醢匠十二人豉匠十  
二人菹醢匠八人掌固四人

衛尉寺卿一人從三品少卿二人從四品上丞二人從

六品上掌器械文物總武庫武器守宮三署兵器入者

皆籍其名數祭祀朝會則供羽儀節鉞金鼓帷帟茵席

凡供宮衛者歲再閱有敝則脩於少府主簿二人從七

品上錄事一人

龍朔二年改日司衛寺武后光宅元年又改有府六人史十一人亭長四人掌

固六人

丞掌判寺事辨器械出納之數大事承制勅小事則聽於尚書省

兩京武庫署令各二人從六品下丞各二人從八品下掌藏兵械有赦建金雞置鼓宮城門之右大理及府縣囚徒至則擊之監事各一人正九品上諸署監事品同

有府各六人史各六人典事各二人掌固各五人開元二十五年東都亦置署

武器署令一人正八品下丞二人正九品下掌外戎器祭祀巡幸則納於武庫給六品以上葬鹵簿檠戟凡戟

廟社宮殿之門二十有四東宮之門一十八一品之門十六二品及京兆河南太原尹大都督大都護之門十四三品及上都督中都督上都護上州之門十二下都督下都護中州下州之門各十衣幡壞者五歲一易之薨卒者既葬追還監事二人

有府二人史六人典事二人掌固四人貞觀中東都

亦置署

守宮署令一人正八品下丞二人正九品下掌供帳帟祭祀巡幸則設王公百官之位吏部兵部禮部試貢舉人則供帷幕王公婚禮亦供帳具京諸司長上官以品給其牀屬供蕃客帷帟則題歲月席壽三年氈壽五年

禱壽七年不及期而壞有罰監事二人

有府二人史四人掌設六人幕

士八十八人掌固四人

宗正寺卿一人從三品少卿二人從四品上丞二人從六品上掌天子族親屬籍以別昭穆領陵臺崇玄二署凡親有五等先定於司封一曰皇帝周親皇后父母視三品二曰皇帝大功親小功尊屬太皇太后皇太后后周親視四品三曰皇帝小功親總麻尊屬太皇太后皇太后皇后大功親視五品四曰皇帝總麻親袒免尊屬太皇太后皇太后皇后小功親視五曰皇帝袒免親太皇太后小功卑屬皇太后皇后總麻親視六品皇帝親

之夫婦男女降本親二等餘親降三等尊屬進一等降

而過五等者不爲親諸王大長公主長公主親本品嗣

王郡王非三等親者亦視五品駙馬都尉視諸親祭祀

冊命朝會陪位襲封者皆以簿書上司封主簿二人從

七品上知圖譜官一人修玉牒官一人知宗子表疏官

一人錄事二人

武德二年置宗師一人後省龍朔二年改宗正寺曰司宗寺武后光宅元年曰

司屬寺有府五人史五人亭長四人掌固四人京都太廟齋郎各一百三十人門僕各三十三人主簿錄事各

二人

諸陵臺令各一人從五品上丞各一人從七品下建初

啓運興寧永康陵令各一人從七品下丞各一人從八

品下掌守衛山陵凡陪葬以文武分左右子孫從父祖

者亦如之宮人陪葬則陵戶成墳諸陵四至有封禁民

葬唯故墳不毀

開元二十四年以宗廟所奉不可名以署太常少卿韋縉奏廢太廟署以少卿

一人知太廟事二十五年濮陽王徹爲宗正卿恩遇甚厚建議以宗正司屬籍乃請以陵寢宗廟隸宗正天寶

十二載駙馬都尉張洵爲太常卿得幸又以太廟諸陵署隸太常十載改獻昭乾定橋五陵署爲臺升令品丞

康興寧二陵稱署如故至德二年復以陵廟隸宗正永泰元年太常卿姜慶初復奏以陵廟隸太常大歷二年

復舊陵臺有錄事各一人府各二人史各四人主衣主輦主藥各四人典事各三人掌固各二人陵戶各三百

人昭陵乾陵橋陵增百人諸陵有錄事各一人府各一人史各二人典事各二人掌固各二人陵戶各百人

諸太子廟令各一人從八品上丞各一人正九品下錄

事各一人令掌灑掃開闔之節四時享祭焉

有府各一人史各二

人典事各二人  
掌固各一人

諸太子陵令各一人從八品下丞各一人從九品下錄

事各一人

有府各一人史各二人典事各二人掌固各一人陵戶各三十人太常舊有太廟署令一

人從七品下丞二人從七品下齋郎二十四人

崇玄署令一人正八品下丞一人正九品下掌京都諸

親名數與道士帳籍齋醮之事新羅日本僧入朝學問

九年不還者編諸籍道士女冠僧尼見天子必拜凡止

民家不過三夜出踰宿者立案連署不過七日路遠者

州縣給程天下觀一千六百八十七道士七百七十六

女冠九百八十八寺五千三百五十八僧七萬五千五



百二十四尼五萬五百七十六兩京度僧尼道士女冠  
御史一人泄之每三歲州縣爲籍一以留縣一以留州  
僧尼一以上祠部道士女冠一以上宗正一以上司封  
有府二人史三人典事六人掌固二人崇立學博士一  
人學生百人隋以署隸鴻臚又有道場玄壇唐置諸寺  
觀監隸鴻臚寺每寺觀有監一人貞觀中廢寺觀監上  
元二年置漆園監尋廢開元二十五年置崇立學於立  
元皇帝廟天寶元年兩京置博士助教各一員學生百  
人每祠享以學生代齋郎二載改崇立學曰崇賢館博  
士曰學士助教曰直學士置大學士一人以宰相爲之  
領兩京立元宮及道院改天下崇立學爲通道學博士  
曰道德博士未幾而罷寶應永泰間學生存者亡幾大  
曆三年復增至百人初天下僧尼道士女冠皆隸鴻臚  
寺武后延載元年以僧尼隸祠部開元二十四年道七  
女冠隸宗正寺天寶二載以道士隸司封貞元四年崇  
立館罷大學士後復置左右街大功德使東都功德使  
脩功德使總僧尼之籍及功役元和二年以道士女冠

隸左右街功德使會昌二年以僧尼隸主客太清宮置  
立元館亦有學士至六年廢而僧尼復隸兩街功德使

太僕寺卿一人從三品少卿二人從四品上丞四人從

六品上主簿二人從七品上錄事二人卿掌廐牧輦輿

之政總乘黃典廐典牧車府四署及諸監牧行幸供五

路屬車凡監牧籍帳歲受而會之上駕部以議考課永

中太僕寺曰司馭寺武后光宅元年改曰司僕寺有府  
十七人史三十四人獸醫六百人獸醫博士四人學生

百人亭長四  
人掌固六人

乘黃署令一人從七品下丞一人從八品下掌供車路

及馴馭之法凡有事前期四十日率駕士調習尚乘隨

路色供馬前期二十日調習於內侍省有府一人史二  
人駕士一百四

十人羊車小史十  
四人掌固六人

典廄署令二人從七品下丞四人從八品下掌飼馬牛

給養雜畜良馬一丁中馬二丁駑馬三丁乳駒乳犢十

給一丁

有府四人史八人主乘六人典事八人執馭百人駕士八百人掌固六人

典牧署令三人正八品上丞六人從九品上掌諸牧雜

畜給納及酥酪脯腊之事羣牧所送羊犢以供廩犧尚

食監事八人

有府四人史八人典事十六人主酪七十四人駕士百六十八人掌固四人

車府署令一人正八品下丞一人正九品下掌王公以

下車路及馴馭之法從官三品以上昏葬給駕士凡路

車之馬牛率馭士調習

有府一人史二人典書四人馭士百七十五人掌固六人

諸牧監上牧監監各一人從五品下副監各二人正六品下丞各二人正八品上主簿各一人正九品下中牧監監正六品下副監從六品下丞從八品上主簿從九品上下牧監監從六品下副監正七品下丞正九品上主簿從九品下中牧監副監丞減上牧監一員南使西使丞各三人從七品下錄事各一人從九品下北使鹽州使丞各二人從七品下掌羣牧孳課凡馬五千爲上監三千爲中監不及爲下監馬牛之羣有牧長有尉馬之駑良皆著籍良馬稱左駑馬稱右每歲孟秋羣牧使以諸監之籍合爲一以仲秋上於寺送細馬則有牽夫

識馬小兒獸醫等凡馬游牝以三月駒犢在牧者三歲

別羣孳生過分有賞死耗亦以率除之歲終監牧使巡

按以功過相除爲考課

上牧監有錄事各一人府各三人史各六人典事各八人掌固

各四人中牧監減府一人史典事各減二人下牧監典事掌固減三人南使西使錄事史各一人府各五人史各九人北使鹽州使錄事以下員數及品如南使麟德中置八使分總監坊秦蘭原渭四州及河曲之地凡監四十有八南使有監十五西使有監十六北使有監七鹽州使有監八嵐州使有監二自京師西屬隴右有七馬坊置隴右三使領之又有沙苑樓煩天馬監沙苑監掌畜隴右諸牧羊給宴祭及尚食所用每歲與典牧署供焉自監以下品數如下

收監至開元二十三年廢監

東宮九牧監丞二人正八品上錄事一人從九品下掌

牧養馬牛以供皇太子之用

有錄事史各一人府三人史六人初監有監副監丞

至簿錄事各一人府二人史四人典事四人掌固二人自監以下品同下牧監又有馬牧使有丞以下官一

大理寺卿一人從三品少卿二人從五品下掌折獄詳

刑凡罪抵流死皆上刑部覆於中書門下繫者五日一

慮

龍朔二年改曰詳刑寺武后光宅元年改曰司刑寺中宗時廢獄丞有府二十八人史五十六人司直史

十二人評事史二十四人獄史六人亭長四人掌固十八人問事百人

正二人從五品下掌議獄正科條凡丞斷罪不當則以

法正之五品以上論者莅決巡幸則留總持寺事

丞六人從六品上掌分判寺事正刑之輕重徒以上囚

則呼與家屬告罪問其服否

至簿二人從七品上掌印省署鈔目句檢稽失凡官吏

抵罪及雪免皆立簿私罪贖銅一斤公罪二斤皆爲一  
負十負爲一殿每歲吏部兵部牒覆選人殿負錄報焉  
獄丞二人從九品下掌率獄史知囚徒貴賤男女異獄  
五品以上月一沐暑則置漿禁紙筆金刃錢物杵槌入  
者囚病給醫藥重者脫械鎖家人入侍

司直六人從六品上評事八人從八品下掌出使推按  
凡承制推訊長吏當停務禁錮者請魚書以往錄事二  
人

鴻臚寺卿一人從三品少卿二人從四品上丞一人從  
六品上掌賓客及凶儀之事領典客司儀二署凡四夷

君長以蕃望高下爲簿朝見辨其等位第三等居武官  
三品之下第四等居五品之下第五等居六品之下有  
官者居本班御史察食料二王後夷狄君長襲官爵者  
辨嫡庶諸蕃封命則受冊而往海外諸蕃朝賀進貢使  
有下從留其半於境繇海路朝者廣州擇首領一人左  
右二人入朝所獻之物先上其數於鴻臚凡客還鴻臚  
籍衣齋賜物多少以報主客給過所蕃客奏事具至日  
月及所奏之宜方別爲狀月一奏爲簿以副藏鴻臚獻  
馬則殿中太僕寺涖閱良者入殿中駑病入太僕獻藥  
者鴻臚寺驗覆少府監定價之高下鷹鷂狗豹無估則



鴻臚定所報輕重凡獻物皆客執以見駝馬則陳于朝堂不足進者州縣留之皇帝皇太子爲五服親及大臣發哀臨弔則卿贊相大臣一品葬以卿護二品以少卿

三品以丞皆司儀示以禮制主簿一人從七品上錄事

二人

龍朔二年改鴻臚寺曰同文寺武后光宅元年改曰司賓寺有府五人史十人亭長四人掌固六人

典客署令一人從七品下丞三人從八品下掌二王後

介公鄙公之版籍及四夷歸化在藩者朝賀宴享送迎皆預焉會渠首領朝見者給稟食病則遣醫給湯藥喪則給以所須還蕃賜物則佐其受領教拜謝之節

有典客十

三人府四人史八人掌固二人

掌客十五人正九品上掌送迎蕃客顯莅館舍

司儀署令一人正八品下丞一人正九品下掌凶禮喪葬之具京官職事三品以上散官二品以上祖父母父母喪職事散官五品以上都督刺史卒于京師及五品死王事者將葬祭以少牢率齋郎執俎豆以往三品以上贈以束帛黑一纁二一品加乘馬旣引遣使贈於郭門之外皆有束帛一品加璧五品以上葬給營墓夫

有司

儀六人府二人史四人掌設十八人齋郎三十人掌固四人幕士六十八人

司農寺卿一人從三品少卿二人從四品上掌倉儲委積之事總上林太倉鉤盾灋官四署及諸倉司竹諸湯

宮苑鹽池諸屯等監凡京都百司官吏祿稟朝會祭祀所須皆供焉藉田則進耒耜

丞六人從六品上總判寺事凡租及藁秸至京都者閱而納焉官戶奴婢有技能者配諸司婦人入掖庭以類相偶行宮監牧及賜王公公主皆取之凡孳生雞彘以戶奴婢課養俘口則配輕使始至給稟食主簿二人從七品上錄事二人

龍朔二年改司農寺曰司稼寺有府三十八人史七十六人計史三人亭

長九人掌固七人

上林署令二人從七品下丞四人從八品下掌苑園池植果蔬以供朝會祭祀及尚食諸司常料季冬藏冰

千段先立春三日納之冰井以黑牡秬黍祭司寒仲春

啓冰亦如之監事十人

有府七人史十四人典事二十四人掌固五人

太倉署令三人從七品下丞五人從八品下監事八人

掌廩藏之事

有府十人史二十人典事二十四人掌固八人

鈎盾署令二人正八品上丞四人正九品上監事十人

掌供薪炭鵝鴨蒲藺陂池藪澤之物以給祭祀朝會饗

燕賓客

有府七人史十四人典事十九人掌固五人

導官署令二人正八品下丞四人正九品上監事十人

掌導擇米麥凡九穀皆隨精麤差其耗損而供焉

有府八人

史十六人典事二十四人掌固五人初有御細倉督麵麪倉督貞觀中省

太原永豐龍門等倉每倉監一人正七品下丞二人從

八品上掌倉廩儲積凡出納帳藉歲終上寺

有錄事一人府三人

史六人典事八人掌固六人龍門等倉減府一人史典事掌固各減二人

司竹監一人從六品下副監一人正七品下丞二人正

八品上掌植竹葦供宮中百司簾篋之屬歲以筍供尚

食

有錄事一人府二人史四人典事三十人掌固四人葦園匠一百人

慶善石門溫泉湯等監每監監一人從六品下丞一人

正七品下掌湯池宮禁防堰及侍粟芻脩調度以備供

奉王公以下湯館視貴賤爲差凡近湯所潤瓜蔬先時

而熟者以薦陵廟

有錄事一人府一人史二人掌固四人

京都諸宮苑總監監各一人從五品下副監各一人從

六品下丞各二人從七品下主簿各二人從九品上掌

苑內宮館園池禽魚果木凡官屬人畜出入皆有籍

有錄

事各二人府各八人史各十六人亭長各四人掌固各六人獸醫各五人

京都諸園苑監苑四面監監各一人從六品下副監各

一人從七品下丞各二人正八品下掌完葺苑面宮館

園池與種蒔蕃養六畜之事

顯慶二年改青城宮監曰東都苑北面監明德宮監

曰東都苑南面監洛陽宮農圃監曰東都苑東面監倉貨監曰東都苑西面監有錄事各一人府各三人史各

六人典事各六人掌固各六人

九成宮總監監一人從五品下副監一人從六品下丞

一人從七品下主簿一人從九品上掌脩完宮苑供進

鍊餌之事

有錄事一人府三人自監以下品同宮苑武德初改隋仁壽宮監曰九成宮監

諸鹽池監監一人正七品下掌鹽功簿帳

有錄事一人史二人

諸屯監一人從七品下丞一人從八品下掌營種屯田

句會功課及畜產帳簿以水旱蝻蝗定課屯主勸率營

農督斂地課

有錄事一人府一人史二人典事二人掌固四人每屯主一人屯副一人主簿一人

錄事一人府三人史五人

太府寺卿一人從三品少卿二人從四品上掌財貨廩

藏貿易總京都四市左右藏常平七署凡四方貢賦百

官俸秩謹其出納賦物任土所出定精麤之差祭祀幣

帛皆供焉

龍朔二年改太府寺日外府寺武后光宅元年改日司府寺中宗卽位復日太府寺有府

二十五人史五十人計史  
四人亭長七人掌固七人

丞四人從六品上掌判寺事凡元日冬至以方物陳于  
庭者受而進之會賜及別勅六品以下賜者給於朝堂  
以一人主左右藏署帳凡在署爲簿在寺爲帳三月一  
報金部

主簿二人從七品上掌印省鈔目句檢稽失平權衡度  
量歲以八月印署然後用之錄事二人

兩京諸市署令一人從六品上丞二人正八品上掌財  
貨交易度量器物辨其真僞輕重市肆皆建標築土爲



候禁權固及參市自殖者凡市日中擊鼓三百以會衆  
日入前七刻擊鉦三百而散有果毅巡邏平貨物爲三  
等之直十日爲簿車駕行幸則立市于頓側互市有衛  
士五十人以察非常

有錄事一人府三人史七  
人典事三人掌固一人

左藏署令三人從七品下丞五人從八品下監事八人  
掌錢帛雜綵天下賦調卿及御史監閱

有府九人史十  
八人典事十二

人掌固  
八人

右藏署令二人正八品上丞三人正九品上監事四人

掌金玉珠寶銅鐵骨角齒毛綵畫

有府五人史十二人  
典事七人掌固十人

常平署令一人從七品上丞二人從八品下監事五人

掌平糶倉儲出納

有府四人史八人典事五人掌固六人顯慶三年置署武后時東都亦置

署

國子監祭酒一人從三品司業二人從四品下掌儒學  
訓導之政總國子太學廣文四門律書算凡七學天子  
視學皇太子齒胄則講義釋奠執經論議奏京文武七  
品以上觀禮凡授經以周易尚書周禮儀禮禮記毛詩  
春秋左氏傳公羊傳穀梁傳各爲一經兼習孝經論語  
老子歲終考學官訓導多少爲殿最  
丞一人從六品下掌判監事每歲七學生業成與司業  
祭酒莅試登第者上於禮部

主簿一人從七品下掌印句督監事七學生不率教者

舉而免之錄事一人從九品下

武德初以國子監曰國子學隸太常寺貞觀二

年復曰監龍朔二年改國子監曰司成館祭酒曰大司成司業曰少司成咸亨元年復曰監垂拱元年改國子監曰成均監有府七人史十三人亭長六人掌固八人

國子監博士五人正五品上掌教三品以上及國公子

孫從二品以上曾孫爲生者五分其經以爲業周禮儀

禮禮記毛詩春秋左氏傳各六十人暇則習隸書國語

說文字林三倉爾雅每歲通兩經求仕者上於監秀才

進士亦如之學生以長幼爲序習正業之外教吉凶二

禮公私有事則相儀

龍朔二年改博士曰宣業有大成十人學生八十人典學四人廟幹

二人掌固四人東  
都學生十五人

助教五人從六品上掌佐博士分經教授

直講四人掌佐博士助教以經術講授

五經博士各二人正五品上掌以其經之學教國子周  
易尚書毛詩左氏春秋禮記爲五經論語孝經爾雅不  
立學官附中經而已

太學博士六人正六品上助教六人從七品上掌教五  
品以上及郡縣公子孫從三品曾孫爲生者五分其經  
以爲業每經百人

有學生七十人典學四人掌  
固六人東都學生十五人

廣文館博士四人助教二人掌領國子學生業進士者

有學生六十人東都十人天寶九載置廣文館有知進士助教後罷知進士之名

四門館博士六人正七品上助教六人從八品上直講

四人掌教七品以上侯伯子男子爲生及庶人子爲俊

士生者

有學生三百人典學四人掌固六人東都學生五十人

律學博士三人從八品下助教一人從九品下掌教八

品以下及庶人子爲生者律令爲韻業兼習格式法例

隋律學隸大理寺博士八人武德初隸國子監尋廢貞觀六年復置顯慶三年又廢以博士以下隸大理寺龍朔二年復置有學生二十人典學二人元和初東都置學生五人

書學博士二人從九品下助教一人掌教八品以下及

庶人子爲生者石經說文字林爲韻業兼習餘書

武德初廢

書學貞觀二年復置顯慶三年又廢以博士以下隸秘書省龍朔二年復有學生十人典學二人東都學生三人

算學博士二人從九品下助教一人掌教八品以下及庶人子爲生者二分其經以爲業九章海島孫子五曹張丘建夏侯陽周髀五經算綴術緝古爲顯業兼習記遺三等數凡六學束脩之禮督課試舉皆如國子學助教以下所掌亦如之

唐廢算學顯慶元年復置三年又廢以博士以下隸太史局龍朔二

年復有學生十人典學一人東都學生二人

少府監一人從三品少監二人從四品下掌百工技巧之政總中尚左尚右尚織染掌冶五署及諸冶鑄錢互

市等監供天子器御后妃服飾及郊廟圭玉百官儀物  
凡武庫袍襦皆識其輕重乃藏之冬至元日以給衛士  
諸州市牛皮角以供用牧畜角筋腦革悉輸焉細鏤之  
工教以四年車路樂器之工三年平漫刀稍之工二年  
矢鏃竹漆屈柳之工半焉冠冕弁幘之工九月教作者  
傳家技四季以令丞試之歲終以監試之皆物勒工名  
丞六人從六品下掌判監事給五署所須金石齒革羽  
毛竹木所入之物各以名數州土爲籍工役衆寡難易  
有等差而均其勞逸主簿二人從七品下錄事二人從

九品上

武德初廢監以諸署隸大府寺貞觀元年復置  
龍朔二年改曰內府監武后垂拱元年日尚方

監有府二十七人史十七人計史三人亭長八人掌固  
六人短蕃匠五千二十九人綾錦坊巧兒三百六十五  
人內作使綾匠八十三人掖庭綾匠百五十人內作  
巧兒四十二人配京都諸司諸使雜匠百二十五人

中尚署令一人從七品下丞二人從八品下掌供郊祀  
圭璧及天子器玩后妃服飾彫文錯綵之制凡金木齒  
革羽毛任土以時而供赦日樹金雞於仗南竿長七丈  
有雞高四尺黃金飾首銜絳幡長七尺承以綵盤維以  
絳繩將作監供焉擊擗鼓千聲集百官父老囚徒坊小  
兒得雞首者官以錢購或取絳幡而已歲二月獻牙尺  
寒食獻毬五月獻綬帶夏至獻雷車七月獻鈿針臘日  
獻口脂唯筆琴瑟絃月獻金銀暨紙非旨不獻製魚袋



以給百官蕃客賜寶鈿帶魚袋則授鴻臚寺丞主簿監

作四人從九品下凡監作皆同品

有府九人史十八人典事四人掌固四人

唐改內尚方署曰中尚方署武后改少府監曰尚方監而中左右尚方織染方掌冶方五署皆去方以避監自是不改矣有金銀作坊院

左尚署令一人從七品下丞五人從八品下掌供翟扇

蓋繖五路五副七輦十二車及皇太后皇太子公主王

妃內外命婦王公之車路凡畫素刻鏤與宮中蠟炬雜

作皆領之監作六人

有府七人史二十人典事十八人掌固十四人

右尚署令二人從七品下丞四人從八品下掌供十二

閑馬之轡每歲取於京兆河南府加飾乃進凡五品三

部之帳刀劔斧鉞甲冑紙筆茵席履舄皆擬其用皮毛

之工亦領焉監作六人

有府七人史二十人典事十三人掌固十人

織染署令一人正八品上丞二人正九品上掌供冠冕  
組綬及織紅色染錦羅紗縠綾紬縵絹布皆廣尺有八  
寸四丈爲疋布五丈爲端綿六兩爲屯絲五兩爲絢麻  
三斤爲縠凡綾錦文織禁止於外高品一人專蒞之歲  
奏用度及所織每掖庭經錦則給酒羊七月七日祭杼

監作六人

有府六人史十四人典事十一人掌固五人

掌冶署令一人正八品上丞二人正九品上掌范鎔金

銀銅鐵及塗飾琉璃玉作銅鐵人得採而官收以稅唯

鑪官市邊州不置鐵冶器用所須皆官供凡諸冶成器

上數于少府監然後給之監作二人

有府六人史十二人典事二十三人

掌固

四人

諸冶監令各一人正七品下丞各一人從八品上掌鑄

兵農之器給軍士屯田居民唯興農冶額供隴右監牧

監作四人

有錄事一人府一人史一人典事二人  
人掌固四人太原冶減監作二人

諸鑄錢監監各一人副監各二人丞各一人以所在都

督刺史判焉副監上佐丞以判司監事以參軍及縣尉

爲之監事各一人

有錄事各一人府各三人史各四人  
典事各五人凡鑄錢有七監會昌中

增至八監每道置鑄錢

坊一大中初三監廢

互市監每監監一人從六品下丞一人正八品下掌蕃

國交易之事

隋以監隸四方館唐隸少府貞觀六年改  
交市曰互市監副監曰丞武后垂拱元年

曰通市監有錄事一人府二人  
史四人價人四人掌固八人

將作監監二人從三品少監二人從四品下掌土木工  
匠之政總左校右校中校甄官等署百工等監大明興  
慶上陽宮中書門下六軍仗舍閑廡謂之內作郊廟城  
門省寺臺監十六衛東宮王府諸廨謂之外作自十月  
距二月休冶功自冬至距九月休土功凡治宮廟太常  
擇日以聞

丞四人從六品下掌判監事凡外營繕大事則聽制勅

小事則須省符功有長短役有輕重自四月距七月爲長功二月三月八月九月爲中功自十月距正月爲短功長上匠州率資錢以酬雇軍器則勒歲月與工姓名

武德初改令曰大匠少令曰少匠龍朔二年改將作監曰繕工監大匠曰大監少匠曰少監咸亨元年繕工監曰營繕監天寶十一載改大匠曰大監少匠曰少監有府十四人史二十八人計史三人亭長四人掌固六人短蕃匠一萬二千七百四十四人明資匠二百六十八人

主簿二人從七品下掌官吏糧料俸食假使必由之諸司供署監物有闕舉焉錄事二人從九品上

左校署令二人從八品下丞一人正九品下掌梓匠之事樂縣篋簾兵械喪葬儀物皆供焉宮室之制自天子

至士庶有等差官脩者左校爲之監作十人

有府六人  
史十二人

監作十  
二人

右校署令二人正八品下丞三人正九品下掌版築塗  
泥丹堊偃厠之事有所須則審其多少而市之監作十

人

有府五人史十人  
典事二十四人

中校署令一人從八品下丞三人正九品下掌供舟車  
兵械雜器行幸陳設則供竿柱閑廡繫秣則供行槽禱  
祀則供棘葛內外營作所須皆取焉監牧車牛有年支  
芻豆則受之以給車坊監事四人

武后時改曰營繕署  
垂拱元年復舊尋廢

開元初復置有府二人史  
六人典事八人掌固二人

甄官署令一人從八品下丞二人正九品下掌琢石陶

土之事供石磬人獸碑柱碾磴甃缶之器勅葬則供明

器監作四人

有府五人史十人典事十八人

百工就谷庫谷斜谷太陰伊陽監監各一人正七品下

副監一人從七品下丞一人正八品上掌采伐材木監

作四人

武德初置百工監掌舟車及營造雜作有監少監各一人丞四人主簿一人又置就谷庫谷斜

谷太陰伊陽五監貞觀中廢百工監高宗置百工署掌東都土木瓦石之功開元十五年爲監有錄事二人府

一人史三人典事二十人

軍器監監一人正四品上丞一人正七品上掌繕甲弩

以時輸武庫總署二一日弩坊二日甲坊主簿一人正

八品下錄事一人從九品下

武德初有武器監一人正八品下掌兵仗廢牧少監

一人丞二人主簿一人七年廢軍器監八年復置九年又廢貞觀六年廢武器監開元以前軍器皆出左尚署三年置軍器監十一年復廢爲甲弩坊隸少府十六年復爲監有府八人史十二人亭長二人掌固四人

弩坊署令一人正八品下丞一人正九品下掌出納弓

稍弓矢排弩刃鏃雜作及工匠監作二人

有府二人史五人典事二人

人貞觀六年改弓弩署爲弩坊署甲鎧署爲甲坊署

甲坊署令一人正八品下丞一人正九品下掌出納甲

冑綾繩筋角雜作及工匠監作二人

有府二人史五人典事二人

都水監使者二人正五品上掌川澤津梁渠堰陂池之

政總河渠諸津監署凡漁捕有禁漑田自遠始先稻後



陸渠長斗門長節其多少而均焉府縣以官督察

丞二人從七品上掌判監事凡京畿諸水因灌溉盜費者有禁水入內之餘則均王公百官

主簿一人從八品下掌運漕漁捕程會而糾舉之

武德初廢

都水監爲署貞觀六年復爲監改令曰使者龍朔二年改都水監曰司津監使者曰監武后垂拱元年改都水監曰水衡監使者曰都尉開元二十五年不隸將作監有錄事一人府五人史十人亭長一人掌固四人初貞觀六年置舟楫署有令一人正八品下掌舟楫運漕漕正一人府三人史六人監漕一人漕史一人典事六人掌固八人上元二年置丞二人正九品下掌運漕隱失開元二十六年署廢

河渠署令一人正八品下丞一人正九品上掌河渠陂池隄堰魚醢之事凡溝渠開塞漁捕時禁皆額之饗宗

廟則供魚鮓祀昊天上帝有司攝事則供腥魚日供尚  
食及給中書門下歲供諸司及東宮之冬藏渭河三百  
里內漁釣者五坊捕治之供祠祀則自便橋至東渭橋  
禁民漁三元日非供祠不採魚

唐有河隄使者貞觀初改曰河隄謁者有府三

人史六人典事三人每渠及斗門有長一人掌固三人  
魚師十三人初有監漕十人從九品上大曆後省與成  
五門六門龍首涇堰滋隄凡六堰皆有丞一人從九品  
下府一人史二人典事一人掌固二人貞觀六年皆廢  
河隄謁者六人正八品下掌完隄堰利溝瀆漁捕之事  
涇渭白渠以京兆少尹一人督視

諸津令各一人正九品上丞二人從九品下掌天下津  
濟舟梁灞橋永濟橋以勳官散官一人莅之天津橋中

橋則以衛士拚掃凡舟渠之備皆先擬其半柳塞竹篝

所在供焉

唐改津尉曰令有錄事一人府一人史二人典事三人津吏五人橋丁各三十人匠各八

人京兆河南諸津隸都水監便橋渭橋萬年三橋有丞一人從九品下府一人史七人典事二人掌固二人貞

觀中廢

唐書卷四十八

唐書卷四十八考證

百官志三御史臺大夫一人正三品○舊書作從三品  
監察御史十五人正八品下○舊書作正八品上

唐書卷四十八考證

唐書卷四十九上

宋 翰 林 學 士 歐 陽 修 撰

志第三十九上

百官志

十六衛

左右衛上將軍各一人從二品大將軍各一人正三品  
將軍各二人從三品掌宮禁宿衛凡五府及外府皆總  
制焉凡五府三衛及折衝府驍騎番上者受其名簿而  
配以職皇帝御正殿則守諸門及內廂宿衛仗非上日  
亦將軍一人押仗將軍缺以中郎將代將軍掌貳上將

軍之事左右驍騎左右武衛左右威衛左右領軍左右

金吾左右監門衛上將軍以下品同

武德五年改左右翊衛曰左右衛府

左右驍騎衛曰左右驍騎府左右屯衛曰左右威衛左右  
右禦衛曰左右領軍衛左右備身府曰左右府唯左右  
武衛府左右監門府左右候衛仍隋不改顯慶五年改  
左右府曰左右千牛府龍朔二年左右衛府驍衛府武  
衛府皆省府字改左右威衛曰左右武威衛左右領軍  
衛曰左右戎衛左右候衛曰左右金吾衛左右監門府  
曰左右監門衛左右千牛府曰左右奉宸衛後又曰左  
右千牛衛咸亨元年改左右戎衛曰領軍衛武后光宅  
元年改左右驍衛曰左右武威左右武衛曰左右鷹揚  
衛左右威衛曰左右豹韜衛左右領軍衛曰左右玉鈐  
衛貞元二年初置十六衛上將軍左右衛有錄  
事一人府一人史二人亭長八人掌固四人

長史各一人從六品上掌判諸曹五府外府稟祿卒伍  
軍團之名數器械車馬之多少小事得專達每歲秋贊

大將軍考課

錄事參軍事各一人正八品上掌受諸曹及五府之外  
府事句稽抄目印給紙筆

倉曹參軍事各二人正八品下掌五府文官勲考假使

祿俸公廩田園食料醫藥過所自倉曹以下同品

有府二人

史四人兵曹府四人史七人騎曹府二人史四人曹曹  
府三人史三人武后長安初改鎧曹曰曹曹中宗卽位  
復舊先天元年又曰曹曹開元初諸衛司倉司  
兵騎兵參軍改曰倉曹兵曹騎曹曹參軍事

兵曹參軍事各二人掌五府武官宿衛番第受其名數  
而大將軍配焉

騎曹參軍事各一人掌外府雜畜簿帳牧養凡府馬承



直以遠近分七番月一易之以勅出宮城者給馬

曹曹參軍事各一人掌兵械公廨興繕罰謫大朝會行從則受黃質甲鎧弓矢於衛尉

奉車都尉掌馭副車有其名而無其人大陳設則它官攝駙馬都尉無定員與奉車都尉皆從五品下司階各二人正六品上中候各三人正七品下司戈各五人正八品下執戟各五人正九品下長上各二十五人從九品下

武后天授二年置諸衛司階中候司戈執戟謂之四色官

親衛之府一曰親府勳衛之府二一曰勳一府二曰勳二府翊衛之府二一曰翊一府二曰翊二府凡五府每

府中郎將一人正四品下左右郎將一人正五品上親衛正七品上勳衛從七品上翊衛正八品上總四千九百六十三人兵曹參軍事各一人正九品上校尉各五人正六品上每校尉有旅帥二人從六品上每旅帥各有隊正二十人正七品上副隊正二十人正七品下五府中郎將掌領校尉旅帥親衛勳衛之屬宿衛者而總其府事左右郎將貳焉番上者以名簿上于大將軍而配以職武德貞觀世重資蔭二品三品子補親衛二品曾孫三品孫四品子職事官五品子若孫勳官三品以上有封及國公子補勳衛及率府親衛四品孫五品及

上柱國子補翊衛及率府勳衛勳官二品及縣男以上散官五品以上子若孫補諸衛及率府翊衛王府執仗親事執乘親事每月番上者數千人宿衛內廡及城門給稟食執扇三衛三百人擇少壯肩膊齊儀容整美者本衛印臂送殿中省肄習仗下每番三衛一人爲太僕寺引輅其後入官路艱三衛非權勢子弟輒退番柱國子有白首不得進者流外雖鄙不數年給祿稟故三衛

益賤人罕趨之

有錄事府一人史三人唐親衛勳衛置驃騎將軍車騎將軍翊衛置車騎將軍

武德七年改驃騎將軍爲中郎將軍車騎將軍皆爲郎將分左右以親衛曰一府勳衛翊衛曰二府謂之三府衛諸衛翊衛及率府親勳衛亦曰三衛永徽三年避太子諱改中郎將曰旅賁郎將曰翊軍郎太子廢復舊

左右驍衛上將軍各一人大將軍各一人將軍各二人

掌同左右衛凡翊府之翊衛外府豹騎番上者分配之

凡分兵守諸門在皇城四面宮城內外則與左右衛分

知助鋪長史各一人錄事參軍事各一人倉曹參軍事

各二人兵曹參軍事各二人騎曹參軍事各一人胄曹

參軍事各一人左右司階各二人左右中候各三人左

右司戈各五人左右執戟各五人左右翊中郎將府中

郎將各一人左郎將各一人右郎將各一人兵曹參軍

事各一人校尉各五人旅帥各十人隊正各二十人副

隊正各二十人

有錄事一人史二人亭長一人掌固四人倉曹府二人史二人兵曹府三人史

五人騎曹府二人史四人曹曹府三人史三人  
左右翊中郎將府錄事一人府一人史二人

左右武衛上將軍各一人大將軍各一人將軍各二人  
掌同左右衛凡翊府之翊衛外府熊渠番上者分配之  
長史各一人錄事參軍事各一人倉曹參軍事各二人  
兵曹參軍事各二人騎曹參軍事各一人曹曹參軍事  
各一人左右司階各二人左右中候各三人左右司戈  
各五人左右執戟各五人長上各二十五人左右翊中  
郎將府官同驍騎有稱長二人錄事一人史二人亭長  
二人掌固四人倉曹府二人史四人  
兵曹府三人史五人騎曹府三人史四人曹  
曹府三人史三人稱長掌唱警爲應蹕之節  
左右威衛上將軍各一人大將軍各一人將軍各二人

掌同左右衛凡翊府之翊衛外府羽林番上者分配之  
凡分兵主守則知皇城東面助鋪長史各一人錄事參  
軍事各一人倉曹參軍事各二人兵曹參軍事各二人  
騎曹參軍事各一人胄曹參軍事各一人左右司階各

二人左右中候各三人左右司戈各五人左右執戟各

五人長上各二十五人左右翊中郎將府官同驍衛有錄

事一人史二人亭長二人掌固四人倉曹府二人史四人  
兵曹府三人史五人騎曹府二人史四人胄曹府三

人史  
三人

左右領軍衛上將軍各一人大將軍各一人將軍各二  
人掌同左右衛凡翊府之翊衛外府射聲番上者分配

之凡分兵主守則知皇城西面助鋪及京城苑城諸門  
長史各一人錄事參軍事各一人倉曹參軍事各二人  
兵曹參軍事各二人騎曹參軍事各一人胄曹參軍事  
各一人左右司階各二人左右中候各三人左右司戈  
各五人左右執戟各五人長上各二十五人左右翊中  
郎將府官同驍衛有錄事二人史二人亭長二人掌固  
四人倉曹府二人史四人兵曹府三  
人史五人騎曹府一人史  
四人胄曹府三人史三人

左右金吾衛上將軍各一人大將軍各一人將軍各二  
人掌宮中京城巡警烽候道路水草之宜凡翊府之翊  
衛及外府飲飛番上皆屬焉師田則執左右營之禁南

衛宿衛官將軍以下及千牛番上者皆配以職大功役則與御史循行凡敝幕故氊以給病坊

兵曹參軍事掌翊府外府武官兼掌獵師

騎曹參軍事掌外府雜畜簿帳牧養之事

冑曹參軍事掌同左右衛大朝會行從給青龍旗襍稍於衛尉長史各一人錄事參軍事各一人倉曹參軍事各二人兵曹參軍事各二人騎曹參軍事各一人冑曹參軍事各一人左右司階各二人左右中候各三人左右司戈各五人左右執戟各五人左右街使各一人判官各二人左右翊中郎將府官如驍衛

有錄事一人史二人倉曹府二



人史四人兵曹府三人史五人騎曹府二人史四人曹  
曹府三人史三人左右街典二人引駕仗三衛六十八  
引駕仗飛六十六人大角手  
六百人隋有察非掾至唐廢

左右翊中郎將府中郎將掌領府屬督京城左右六街  
鋪巡警以果毅二人助巡探入閣日中郎將一人升殿  
受狀衛士六百爲大角手六番閱習吹大角爲昏明之  
節諸營壘候以進退

左右街使掌分察六街徼巡凡城門坊角有武侯鋪衛  
士曠騎分守大城門百人大鋪三十人小城門二十人  
小鋪五人日暮鼓八百聲而門閉乙夜街使以騎卒循  
行囂譁武官暗探五更二點鼓自內發諸街鼓承振坊

市門皆啓鼓三千搥辨色而止

左右監門衛上將軍各一人大將軍各一人將軍各二人掌諸門禁衛及門籍文武官九品以上每月送籍於引駕仗及監門衛衛以帳報內門凡朝參奏事待詔官及繖扇儀仗出入者閱其數以物貨器用入宮者有籍有傍左監門將軍判入右監門將軍判出月一易其籍行幸則率屬於衙門監守

長史掌判諸曹及禁門巡視出入而司其籍傍餘同左右衛兵曹參軍事兼掌倉曹冑曹兼掌騎曹

左右翊中郎將府中郎將掌掖宮殿城門皆左入右出

中郎將各四人長史各一人錄事參軍事各一人兵曹

參軍事各一人胄曹參軍事各一人

有錄事一人史二人亭長二人掌固

二人兵曹府三人史五人胄曹府三人史四人監門校尉三百二十人直長六百八十人長入長上二十人直

長長上二十人監門校尉掌敘

出入唐改監門府郎將爲將軍

左右千牛衛上將軍各一人大將軍各一人將軍各二

人掌侍衛及供御兵仗以千牛備身左右執弓箭宿衛

以主仗守戎器朝日領備身左右升殿列侍親射則率

屬以從胄曹參軍事掌甲仗凡御仗之物二百一十有

九羽儀之物三百自千牛以下分掌之上日執御弓箭

者亦自備以入宿主仗每月上則配以職行從則兼騎

曹中郎將各二人長史各一人錄事參軍事各一人兵

曹參軍事各一人曹曹參軍事各一人

唐改備身郎將曰將軍備身將

日中郎將千牛左右備身左右曰千牛備身初置備身主仗有錄事一人史二人亭長二人掌固四人兵曹府

一人史二人曹曹府一人史一人千牛備身十二人備

身左右十二人備身二百人主仗一百五十人千牛備

身掌執御刀服花鈿綉衣綠執象笏宿衛侍從備身左

右掌執御弓矢宿衛侍從備身掌宿衛侍從主仗掌守

供御兵仗

左右翊中郎將府中郎將掌供奉侍衛凡千牛及備身

左右以御刀仗升殿供奉者皆上將軍領之中郎將佐

其職有口勅通事舍人承傳聲不下聞者中郎將宣告

諸衛折衝都尉府每府折衝都尉一人上府正四品上

中府從四品下下府正五品下左右果毅都尉各一人  
上府從五品下中府正六品上下府正六品下別將各  
一人上府正七品下中府從七品上下府從七品下長  
史各一人上府正七品下中府從七品上下府從七品  
下兵曹參軍事各一人上府正八品下中府正九品下  
下府從九品上校尉五人從七品下旅帥十人從八品  
上隊正二十人正九品下副隊正二十人從九品下折  
衝都尉掌領屬備宿衛師役則總戎具資糧點習以三  
百人爲團一校尉領之捉鋪持更者晨夜有行人必問  
不應則彈弓而嚮之復不應則旁射又不應則射之書

以排門人遠望暮夜以持更人遠聽有衆而囂則告主

帥

左右果毅都尉掌貳都尉

每府有錄事一人府一人史二人兵曹府二人史二人每

隊正領兵五十人武德元年改鷹揚郎將曰軍頭正四品下鷹擊郎將曰府副正五品上司馬曰長史止八品下校尉正六品下旅帥正七品下廢越騎步兵二校尉及察非掾又改軍頭曰驃騎將軍府副曰車騎將軍皆爲府諸率府置驃騎將軍五人車騎將軍十人二年以車騎將軍府隸驃騎府置十二軍分關內諸府皆隸焉每軍將軍一人副一人至六年廢七年改驃騎將軍府爲統軍府車騎將軍爲別將八年復置十二軍貞觀十年改統軍府曰折衝都尉別將曰果毅都尉軍坊置坊主一人檢校戶口勸課農桑以本坊五品勳官爲之三輔及近畿州都督府皆置府凡六百三十三丞徽中廢長史置司馬一人總司兵司騎二局武后垂拱中以千二百人爲上府千人爲中府八百人爲下府赤縣爲赤府畿縣爲畿府聖曆元年廢司馬置長史兵曹參軍事

又有別將一人從六品下居果毅都尉之次其後分左右各一人尋廢久之復置一人降其品開元初衛士爲武士諸衛折衝果毅別將擇有行者爲展仗押官右羽林軍十五人左羽林軍二十五人衣服同色諸衛有弩手左右驍衛各八十五人餘衛各八十三人

左右羽林軍大將軍各一人正三品將軍各三人從三品掌統北衙禁兵督攝左右廂飛騎儀仗大朝會則周衛階陛巡幸則夾馳道爲內仗凡飛騎番上者配其職有勅上南衙者大將軍承墨勅白移於金吾引駕仗官與監門奏覆降墨勅然後乃得入長史各一人從六品上錄事參軍事各一人正八品上倉曹參軍事各一人兼總騎曹事兵曹參軍事各一人胄曹參軍事各一人

自倉曹參軍以下皆正八品下司階各二人正六品上  
中候各三人正七品下司戈各五人正八品上執戟各  
五人正九品下長上各十人左右翊衛中郎將府中郎  
將一人正四品下左右中郎一人左右郎將一人皆正  
五品上兵曹參軍事一人正九品上校尉五人旅帥十  
人隊正二十人副隊正二十人

有錄事一人史二人亭長二人掌固四人倉曹

兵曹各府二人史四人胄曹府史各二人左右翊中郎將府錄事一人府一人史二人倉曹兵曹各府二人史四人胄曹府史各二人

左右龍武軍大將軍各一人正二品統軍各一人正三  
品將軍三人從三品掌同羽林長史錄事參軍事倉曹



參軍事兵曹參軍事胄曹參軍事各一人司階各二人

中候各三人司戈執戟各五人長上各十人

景雲元年置龍武將

軍興元元年六軍各置統軍貞元三年龍武軍增將軍一員有錄事一人史二人亭長二人掌固四人倉曹府

二人史四人兵曹府二人史四人胄曹府史各二人

左右神武軍大將軍各一人正二品統軍各一人正三

品將軍三人從三品總衙前射生兵長史錄事參軍事

倉曹參軍事兵曹參軍事胄曹參軍事各一人司階各

二人中候各三人司戈執戟各五人長上各十人

有錄事一

人史二人倉曹兵曹胄曹府史皆如龍武軍開元二十六年分羽林置左右神武軍尋廢至德二年復置

左右神策軍大將軍各一人正二品統軍各二人正三

品將軍各四人從三品掌衛兵及內外八鎮兵護軍中尉各一人中護軍各一人判官各三人都句判官二人句覆官各一人表奏官各一人支計官各一人孔目官各二人驅使官各二人自長史以下員數如龍武軍右左龍武左右神武左右神策號六軍貞元二年神策軍置大將軍將軍十四年置統軍品秩同六軍始殿前左右神威軍有大將軍二人正二品統軍二人從三品將軍二人從五品元和初爲一軍號天威軍八年廢以軍隸神策有馬軍步軍將軍及指揮使等以馬軍大將軍知軍事天復三年廢神策軍四年復置神策軍

### 東宮官

太子太師太傅太保各一人從一品掌輔導皇太子每見迎拜殿門三師答拜每門必讓三師坐太子乃坐與

三師書前名惶恐後名惶恐再拜太子出則乘路備鹵簿以從

少師少傅少保各一人從二品掌曉三師德行以諭皇

太子奉太子以觀三師之道德自太師以下唯其人不

必備

先天元年開府置令丞各一人隸詹事府等廢

太子賓客四人正三品掌侍從規諫贊相禮儀宴會則

上齒侍讀無常員掌講導經學

貞觀十八年以宰相兼賓客開元中定員四人

太宗時晉王府有侍讀及爲太子亦置焉其後或置或否開元初十王宅引辭學工書者入教亦爲侍讀

詹事府太子詹事一人正三品少詹事一人正四品上

掌統三寺十率府之政少詹事爲之貳皇太子書稱令

庶子以下署名奉行書案畫日丞二人正六品上掌判  
府事知文武官簿假使凡勅令及尚書省二坊符牒下  
東宮諸司者皆發焉

主簿一人從七品上錄事二人正九品下

隋廢詹事府  
武德初復置

龍朔二年曰端尹府詹事曰端尹少詹事曰少尹武后  
光宅元年改曰宮尹府詹事曰宮尹少詹事曰少尹有  
令史九人書  
令史十八人

司直一人正七品上掌糾劾宮寮及率府之兵皇太子  
朝則分知東西班監國則詹事庶子爲三司使司直一  
人與司議郎舍人分日受理啓狀太子出則分察鹵簿

之內

有令史一人書令史二  
人亭長四人掌固六人

左春坊左庶子二人正四品上中允二人正五品下掌侍從贊相駁正啓奏總司經典膳藥藏內直典設宮門六局皇太子出則版奏外辦中嚴入則解嚴凡令書下則與中允司議郎等畫諾覆審留所畫以爲案更寫印署注令諾送詹事府

司議郎二人正六品上掌侍從規諫駁正啓奏凡皇太子出入朝謁從祀釋奠講學監國之命可傳於史冊者錄爲記注宮坊祥眚官長除拜薨卒歲終則錄送史館左諭德一人正四品下掌諭皇太子以道德隨事諷贊皇太子朝宮臣則列侍左階出入騎從

左贊善大夫五人正五品上掌傳令諷過失贊禮儀以  
經教授諸郡王錄事二人從八品下主事三人從九品  
下隋有內允武德三年改曰中舍人隸門下坊貞觀初  
曰中允十八年置司議郎永徽三年避皇太子名復  
改中允曰內允太子廢復舊龍朔二年改門下坊曰左  
春坊左庶子曰左中護中允曰左贊善大夫司議郎分  
左右置左右諭德各一人咸亨元年皆復舊司議郎不  
分左右其後諭德廢而司議郎復分儀鳳四年置左右  
贊善大夫各十人以同姓爲之景雲二年始兼用庶姓  
改門下坊曰左春坊復置諭德庶子以比侍中中允以  
比門下侍郎司議郎以比給事中贊善大夫以比諫議  
大夫諭德以比散騎常侍右坊則庶子以比中書令中  
舍人以比中書侍郎太子監國則庶子以比尚書令有令  
史六人書令史十二人傳令四人掌儀一人贊者三人  
亭長三人  
掌固十人

崇文館學士二人掌經籍圖書教授諸生課試舉送如

弘文館校書郎二人從九品下掌校理書籍

貞觀十三年置崇賢

館顯慶元年置學生二十人上元二年避太子名改曰崇文館有學士直學士及讐校皆無常員無其人則庶子領館事開元七年改讐校曰校書郎乾元初以宰相爲學士總館事貞元八年隸左春坊有館生十五人書直一人令史二人書令史二人典書二人榻書手二人楷書手十人熟紙匠一人裝潢匠二人筆匠一人

司經局洗馬二人從五品下掌經籍出入侍從圖書上

東宮者皆受而藏之

文學三人正六品下分知經籍侍奉文章

校書四人正九品下正字二人從九品上掌校刊經史

唐改太子正書曰正字龍朔三年改司經局曰桂坊罷隸左春坊領崇賢館比御史臺以詹事二人爲令比御史大夫司直二人比侍御史以洗馬爲司經大夫置文學四人錄事一人正九品下三年改司經大夫曰桂坊

大夫糾正遠失咸亨元年復隸左春坊省錄事有書令  
史二人書吏二人典書四人楷書二十五人掌固六人  
裝潢匠二人熟紙  
匠筆匠各一人

典膳局典膳郎二人從六品下丞二人正八品上掌進

膳嘗食丞爲之貳每夕更直於厨龍朔二年改典膳監  
曰典膳郎有書令史

二人書吏四人主食六人  
典食二百人掌固四人

藥藏局藥藏郎二人從六品下丞二人正八品上掌和

醫藥丞爲之貳皇太子有疾侍醫診候議方藥將進官

臣泄嘗如尚藥局之職有書令史一人書吏二人侍醫  
四人典藥二人藥童六人掌固

四人

內直局內直郎二人從六品下丞二人正八品下掌符



璽衣服繖扇几案筆硯垣墻

龍朔二年改監曰內直郎副監曰丞有令史一人書

吏二人典服十二人典扇八人典翰八人掌固六人武德中有典璽四人開元中廢

典設局典設郎四人從六品下丞二人正八品下掌湯

沐燈燭汛掃鋪設凡皇太子散齋別殿致齋正殿前一

日設幄坐於東序及室內張帷前楹

龍朔二年改齋帥局曰典設局齋帥

日郎有書令史二人書吏四人幕士二百四十五人掌固十二人

宮門局宮門郎二人從六品下丞二人正八品下掌宮

門管籥凡夜漏盡擊漏鼓而開夜漏上水一刻擊漏鼓

而閉歲終行儺則先一刻而啓皇太子不在則闔正門

還仗如常凡宮中唱時不鼓

龍朔三年改宮門監曰宮門郎有書令史一人書吏

一人門僕百  
八掌固四人

右春坊右庶子二人正四品下中舍人二人正五品下  
掌侍從獻納啓奏中舍人爲之貳皇太子監國下令書  
則晝日至春坊則庶子宣傳中舍人奉行

太子舍人四人正六品上掌令書表啓諸臣上皇太子  
大事以牋小事以啓其封題皆上右春坊通事舍人以  
進

通事舍人八人正七品下掌導宮臣辭見承令勞問右  
諭德一人右贊善大夫五人錄事一人主事二人品皆

如左春坊

隋內舍人隸典書坊武德初改曰中舍人管  
記舍人曰太子舍人永徽元年避太子名復

改中舍人曰內舍人龍朔三年改典書坊曰右春坊右庶子曰右中護中舍人曰右贊善大夫舍人曰右司議郎有令史九人書令史十八人傳令四人典謁四人亭長六人掌固十人

家令寺家令一人從四品上掌飲膳倉儲總食官典倉司藏三署皇太子出入則乘輅車爲導祭祀賓客則供酒食賜予則奉金玉貨幣凡牀几茵席器物非取於將作少府者皆供焉丞二人從七品下掌判寺事凡三署出納皆刺於詹事宅莊田園審肥瘠爲收斂之數宮朝坊府土木營膳則下於司藏主簿一人正九品下唐改司府令曰家令龍朔二年改家令寺曰宮府寺家令曰大夫有錄事一人府十人史二十人亭長四人掌固四人雜匠百人

食官署令一人從八品下丞二人從九品下掌飲膳酒

醴凡四時供送設食皆顓焉供六品以下元日寒食冬

至食於家令厨者

有府二人史四人掌膳四人  
供膳百四十人奉解三十人

典倉署令一人從八品下丞二人從九品下掌九穀醢

醢庶羞器皿燈燭凡園圃樹藝皆受令焉每月籍出納

上於寺歲終上詹事府給戶奴婢番戶雜戶資糧衣服

有府三人史五人  
園丞二人史二人

司藏署令一人從八品下丞二人從九品下掌庫藏財

貨出納營繕

有府三人史四人  
人計史二人

率更寺令一人從四品上掌宗族次序禮樂刑罰及漏

刻之政太子釋奠講學齒胄則總其儀出入乘輅車爲  
導居家令之次坊寺府有罪者論罰庶人杖以下皆送  
大理皇太子未立則斷於大理

丞一人從七品上掌貳令事宮臣有犯理於率更者躬  
問蔽罪而上於詹事

主簿一人正九品下掌印局凡宗族不序禮儀不節音  
律不諧漏刻不審刑名不法皆舉而正之決囚則與丞

同泣

龍朔二年改曰司更寺令曰司更大夫有錄事一  
人府三人史四人漏刻博士二人掌漏六人漏童

二十人典鐘典鼓各十二人亭長四  
人掌固四人漏刻博士掌教漏刻

僕寺僕一人從四品上掌車輿乘騎儀仗喪葬總廢牧

署太子出則率廢牧令進路親馭

丞一人從七品上掌判寺事凡馬畜芻粟歲以季夏上於詹事以時出入而節其數

主簿一人正九品下掌廢牧畜養車騎駕馭儀仗

龍朔二年

改曰馭僕寺僕曰大夫有進馬十一人錄事一人府三人史五人亭長二人掌固三人

廢牧署令一人從八品下丞二人從九品下掌車馬閑廢牧畜皇太子出則率典乘先期習路馬率駕士馭車乘既出進路式路車於西閭外南向以俟凡羣牧隸東宮者皆受其職事典乘四人從九品下

有府三人史六人翼馭十人駕

士十五人掌閑六百人獸醫十人注略三十人翼馭掌調馬執馭

太子左右率府率各一人正四品上副率各二人從四品上掌兵仗儀衛凡諸曹及三府外府皆隸焉元日冬至皇太子朝宮臣諸方使則率衛府之屬爲衛每月三

府三衛及五府超乘番上者配以職

武德五年改左右侍率曰左右衛率

府左右武侍衛率曰左右宗衛率府左右宮門將曰左右監門率府龍朔二年改左右衛率府曰左右典戎衛

左右宗衛率府曰左右司禦率府左右虞候率府曰左右清道衛左右內率府曰左右奉裕衛左右監門率府

曰左右崇掖衛武后垂拱中改左右監門率府曰左右鶴禁衛神龍元年改左右司禦率府曰左右宗衛府左

右清道衛曰左右虞候率府景雲二年左右宗衛府復曰左右司禦率府開元初左右虞候率府復曰左右清

道率府

長史各一人正七品上掌判諸曹府季秋以屬官功狀

上於率而爲考課

錄事參軍事各一人從八品上倉曹參軍事兵曹參軍事  
事曹參軍事騎曹參軍事各一人從八品下倉曹掌  
文官簿書兵曹掌武官簿書胄曹掌器械公廩營繕司  
皆各一人從六品上中候各二人從七品下司戈各二  
人從八品上執戟各三人散長上各十人從九品下左

右司禦清道監門內率府自率以下品同

有錄事一人  
府一人史一人

人倉曹府一人史二人兵曹胄曹各府二人史  
三人騎曹府五人史七人亭長掌固各二人

親府勳府翊府三府每府中郎將各一人從四品上左  
右郎將各一人正五品下中郎將郎將掌其府校尉旅



帥及親勲翊衛之屬宿衛而總其事

兵曹參軍事各一人從九品上掌判旬大朝會及皇太子出則從鹵簿而涖其儀親衛從七品上勲位正八品上翊衛從八品上員皆亡校尉各五人從六品上旅帥各十人正七品下隊正各二十人從八品上

武德元年改功曹曰

親衛義曹曰勲衛良曹曰翊衛置三府有錄事二人府史各一人

太子左右司禦率府率各一人正四品上副率各二人從四品上掌同左右衛凡諸曹及外府旅賁番上者隸焉長史各一人正七品上錄事參軍事各一人從八品上倉曹參軍事兵曹參軍事冑曹參軍事騎曹參軍事

各一人從八品下司階各一人中候各二人司戈各二

人執戟各三人親衛勳衛翊衛三府中郎將以下如左

右衛率府

有錄事一人史二人倉曹府一人史二人兵曹府二人史三人曹曹府史各二人亭長一

人掌固

二人

太子左右清道率府率各一人副率各二人掌晝夜巡

警凡諸曹及外府直盪番上者隸焉皇太子出入則以

清游隊先導後拒隊爲殿長史各一人錄事參軍事各

一人從八品上倉曹參軍事兵曹參軍事冑曹參軍事

各一人從八品下左右司階各一人左右中候各二人

左右司戈各一人左右執戟各三人親衛勳衛翊衛三

府中郎將以下如左右衛率府

有錄事一人史二人亭長二人掌固二人倉曹

府一人史二人兵曹府二人史三人曹曹府二人史二人細引押仗五十八人

太子左右監門率府各一人副率各二人掌諸門禁

衛凡財物器用出者有籍長史各一人錄事叅軍事各

一人正九品上兵曹叅軍事各一人正九品下兼領倉

曹曹叅軍事各一人正九品下監門直長七十八人

從七品下

唐改宮門將曰監門率直事曰直長有錄事一人史二人亭長一人掌固二人兵曹府二

人史二人曹曹府二人史三人

太子左右內率府率各一人副率各一人掌千牛供奉

之事皇太子坐日領千牛升殿射于射宮則千牛奉弓

矢立東階西面率奉弓副率奉矢決拾北面張弓左執  
弣右執簫以進副率以弓拂矢而進各退立於位既射  
左內率啓其中否長史各一人錄事叅軍事各一人正  
九品上兵曹叅軍事各一人正九品下兼領倉曹冑曹  
叅軍事各一人正九品下千牛各四十四人從七品上  
唐置兵曹改司使左右復曰千牛備身主射左右復曰  
備身左右弓箭備身去弓箭之名龍朔二年改千牛備  
身曰奉裕開元中千牛備身備身左右并爲千牛有備  
身二十八人主仗四十人錄事一人史二人兵曹府一  
人史二人冑曹  
府一人史一人

唐書卷四十九上

唐書卷四十九上考證

百官志四上左右羽林軍將軍各三人○舊書作二員  
左右龍武軍大將軍各一人正二品○舊書作正三品

唐書卷四十九上考證

唐書卷四十九下

宋 翰 林 學 士 歐 陽 修 撰

志第三十九下

百官志

王府官

傅一人從三品掌輔正過失諮議參軍事一人正五品  
上掌訏謀議事友一人從五品下掌侍游處規諷道義  
侍讀無定員文學一人從六品上掌校典籍侍從文章  
東西閣祭酒各一人從七品上掌禮賢良導賓客

自祭酒以

下爲王官武德中置師一人常侍二人侍郎四人皆掌  
表啓書疏贊相禮儀舍人四人掌通傳引納謁者二人



舍人二人詒議參軍事友皆正五品下文學祭酒皆正六品下高宗中宗時相王府長史以宰相兼之魏雍衛王府以尚書兼之徐韓二王爲刺史府官同外官資望愈下永淳以前王未出閣則不開府天授二年置皇孫府官玄宗諸子多不出閣王官益輕而員亦減矣景雲二年改師曰傅開元二年廢尋復置廢常侍侍郎謁者舍人開成元年改諸王侍讀日奉諸王講讀大中初復舊

長史一人從四品上司馬一人從四品下皆掌統府僚紀綱職務掾一人掌通判功曹倉曹戶曹事屬一人皆正六品上掌通判兵曹騎曹法曹士曹事主簿一人掌覆省書教記室參軍事二人掌表啓書疏錄事參軍事一人皆從六品上掌付事句稽省署鈔目錄事一人從九品下功曹參軍事掌文官簿書考課陳設倉曹參軍

事掌祿廩厨膳出納市易畋漁芻橐戶曹參軍事掌封  
戶僮僕弋獵過所兵曹參軍事掌武官簿書考課儀衛  
假使騎曹參軍事掌殿牧騎乘文物器械法曹參軍事  
掌按訊決刑士曹參軍事掌土功公廨自功曹以下各  
一人正七品上參軍事二人正八品下行參軍事四人  
從八品上皆掌出使雜檢校典籤二人從八品下掌宣  
傳書教武德中改功曹以下書佐法曹行書佐士曹佐  
皆曰參軍事長兼行書佐日行參軍廢城局參  
軍事又有鎧曹參軍事二人掌儀衛兵仗田曹參軍事  
一人掌公廨職田弋獵水曹參軍事二人掌舟舡漁捕  
芻草皆正七品下家吏二人百司問事謁者一人正七  
品下司閤一人正九品下貞觀中廢鎧曹田曹水曹武  
后時家吏以下皆廢主簿記室有史二人錄事功曹倉  
曹兵曹騎曹法曹士曹各府二人史二人戶曹府史各

二人自典籤以上爲府  
官郡王嗣王不置長史

親事府典軍二人正五品上副典軍二人從五品上皆  
掌校尉以下守衛陪從兼知鞍馬校尉五人從六品上  
旅帥從七品下隊正從八品下隊副從九品下皆掌領  
事帳內陪從自旅帥以下視親事多少乃置帳內府典  
軍二人正五品上副典軍二人從五品上自校尉以下

員如親事府

初典軍以武官及流外爲之領執仗帳內  
等秦王齊王府置左右六護軍府左右護

軍府左右帳內府左一右一護軍府護軍各一人副護  
軍各二人長史錄事參軍事倉曹兵曹鎧曹參軍事各  
一人統軍各五人別將各一人左二右二護軍府左三  
右三護軍府減統軍三人別將六人左右親軍府統軍  
各一人長史各一人錄事參軍事兵曹鎧曹參軍事左  
別將右別將各一人帳內府職員與護軍府同又有庫

直隸親事府驅陞直隸帳內府選材勇爲之貞觀中庫  
直以下皆廢親事府有府一人史二人執仗親事十六  
人執弓仗執乘親事十六人掌供騎乘親事二百三  
十人帳內府有府一人史一人帳內六百六十七人

親王國令一人從七品下大農一人從八品下掌判國  
司尉一人正九品下丞一人從九品下學官長丞各一  
人掌教授內人食官長丞各一人掌營膳食廩牧長丞  
各二人掌畜牧典府長丞各二人掌府內雜事長皆正  
九品下丞皆從九品下有典衛八人掌守衛陪從舍人  
四人錄事一人府四人史八人  
公主邑司令一人從七品下丞一人從八品下掌公主  
財貨稟積田園主簿一人正九品下錄事一人從九品  
下督封租主家財貨出入有史八人謁者二人  
舍人二人家史二人

外官

天下兵馬元帥副元帥都統副都統行軍長史行軍司  
馬行軍左司馬行軍右司馬判官掌書記行軍參謀前  
軍兵馬使中軍兵馬使後軍兵馬使中軍都虞候各一  
人元帥都統招討使掌征伐兵罷則省都統總諸道兵  
馬不賜旌節高祖起兵置左右領軍大都督各總三軍及定京師置左右元帥太原道行軍元帥  
西討元帥皆親王領之天寶末置天下兵馬元帥都統  
朔方河東河北平盧節度使招討都統之名始於此大  
歷八年罷天下兵馬元帥建中四年以李希烈反置諸  
軍行營兵馬都元帥與元元年置副都統會昌中置靈  
夏六道元帥黃巢之難置諸道行營都統天福  
二年置諸道兵馬元帥尋復改曰天下兵馬元帥

行軍司馬掌弼戎政居則習蒐狩有役則申戰守之法

器械糧糈軍籍賜予皆專焉

武德元年改贊治日治中  
太宗即位日司馬下州亦

置焉顯慶二年置洛州司馬武后大足元年東都北都  
雍荆揚益州置左右司馬神龍三年省太極元年雍洛

四大都督府增司  
馬一人亦分左右

掌書記掌朝覲聘問慰薦祭祀祈祝之文與號令升絀

之事行軍參謀關豫軍中機密

景龍元年置掌書記開  
元十二年罷行軍參謀

尋復  
置

節度使副大使知節度事行軍司馬副使判官支使掌

書記推官巡官衙推各一人同節度副使十人館驛巡

官四人府院法直官要籍逐要親事各一人隨軍四人

節度使封郡王則有奏記一人兼觀察使又有判官支

使推官巡官衙推各一人又兼安撫使則有副使判官各一人兼支度營田招討經略使則有副使判官各一人支度使復有遣運判官巡官各一人節度使掌總軍旅顯誅殺初授具帑抹兵仗詣兵部辭見觀察使亦如之辭日賜雙旌雙節行則建節樹六纛中官祖送次一驛輒上聞入境州縣築節樓迎以鼓角衙仗居前旌幢居中大將鳴珂金鉦鼓角居後州縣齋印迎于道左視事之日設禮案高尺有二寸方八尺判三案節度使判宰相觀察使判節度使團練使判觀察使三日洗印視其刑缺歲以八月考其治否銷兵爲上考足食爲中考

邊功爲下考觀察使以豐稔爲上考省刑爲中考辦稅  
爲下考團練使以安民爲上考懲姦爲中考得情爲下  
考防禦使以無虞爲上考清苦爲中考政成爲下考經  
略使以計度爲上考集事爲中考脩造爲下考罷秩則  
交廳以節度使印自隨留觀察使營田等印以郎官主  
之鑰節樓節堂以節院使主之祭奠以時入朝未見不  
入私第京兆河南牧大都督大都護皆親王遙領兩府  
之政以尹主之大都督府之政以長史主之大都護府  
之政以副大都護主之副大都護則兼王府長史其後  
有持節爲節度副大使知節度事者正節度也諸王拜



節度大使者皆留京師

觀察使副使支使判官掌書記推官巡官衙推隨軍要籍進奏官各一人

團練使副使判官推官巡官衙推各一人

防禦使副使判官推官巡官各一人觀察處置使掌察

所部善惡舉大綱凡奏請皆屬於州

貞觀初遣大使十人巡省天下諸

州水旱則遣使有巡察安撫存撫之名神龍二年以五

品以上二十人爲十道巡察使按舉州縣再周而代景

雲二年置都督二十四人察刺史以下善惡置司舉從

事二人秩比侍御史揚益并荆四州爲大都督汴兗魏

冀蒲綿秦洪潤越十州爲中都督皆正三品齊鄆涇襄

安潭遂通梁夔十州爲下都督從三品當時以爲權重

難制罷之唯四大都督府如故置十道按察使道各一

人開元二年曰十道按察採訪處置使至四年罷八年

復置十道按察使秋冬巡視州縣十年又罷十七年復置十道京都兩畿按察使二十年日採訪處置使分十

五道天寶末又兼黜陟使乾元元年改日觀察處置使

西都東都北都牧各一人從二品西都東都北都鳳翔

成都河中江陵興元興德府尹各一人從三品掌宣德

化歲巡屬縣觀風俗錄囚恤鰥寡親王典州則歲以上

佐巡縣武德元年雍州置牧一人以親王爲之然常以別駕領州事永徽中改尹日長史初太宗伐高

麗置京城留守其後車駕不在京都則置留守以右金

吾大將軍爲副留守開元元年改京兆河南府長史復

爲尹通判府務牧缺則行其事十一年太原府亦置尹

及少尹以尹爲留守少尹爲副留守謂之三都留守三  
都大都督府有典獄十八人問事十二人白直一十四  
人典獄以防守囚繫問事以行罰中府上州典獄十四  
人問事八人白直二十人下府中州典獄十二人問事  
六人白直十六人下州典獄八人問事四人白直十六

人自三都以下皆有執刀十五人

少尹二人從四品下掌貳府州之事歲終則更次入計  
司錄參軍事二人正七品上錄事四人從九品上功曹  
倉曹戶曹田曹兵曹法曹士曹參軍事各二人皆正七  
品下參軍事六人正八品下六府錄事參軍事以下減

一人錄事參軍事掌正違失莅符印

武德初改州主簿曰錄事參軍事開

元元年改曰司錄有史十人大都督府有史四人中府有史三人下府都護府上州中州下州有史二人

功曹司功參軍事掌考課假使祭祀禮樂學校表疏書

啓祿食祥異醫藥卜筮陳設喪葬

武德初司功司倉司戶司兵司法司書

佐皆爲司功等參軍事有府四人史十人大都督府有府三人史六人中府有府二人史三人下府有府一人

史三人  
大都護府有府一人  
史二人  
上府有府史各二人  
上州有佐二人  
史五人  
中州減史二人

倉曹司倉參軍事掌租調公廨庖廚倉庫市肆

有府五人  
史十人

三人大都督府有府四人  
史六人  
中府下府各有府三人  
史五人  
都護府有府史各二人  
上州有佐二人  
史五人  
中州下州減史二人

戶曹司戶參軍事掌戶籍計帳道路過所蠲符雜徭逋

負良賤芻藁逆旅婚姻田訟旌別孝弟

有府八人  
史十人  
六人  
帳史二人

知籍按帳目捉錢大都督府有府四人  
史七人  
帳史二人  
中府有府三人  
史五人  
帳史一人  
下府有府二人  
史五人  
帳史一人  
上州有佐四人  
史六人  
帳史一人  
中州有佐三人  
史五人  
帳史一人  
下州有佐二人  
史四人  
帳史一人  
都護府有府史各二人  
帳史一人

田曹司田參軍事掌園宅口分永業及蔭田

景龍三年  
初置司田

參軍事唐隆九年省上元二年復置有府四人史十人  
大都督府有府二人史六人中府有府史各二人下府  
有府一人史二人上州有佐二  
人史五人中州下州減史二人

兵曹司兵參軍事掌武官選兵甲器仗門禁管鑰軍防

烽候傳驛畋獵

有府六人史十四人大都督府有府四  
人史八人中府有府三人史六人下府

有府二人史五人都護府有府三人史四  
人上州有佐二人史五人中州減史二人

法曹司法參軍事掌鞠獄麗法督盜賊知贓賄沒入

府有

六人史十四人大都督府有府三人史八人中府有府  
三人史六人下府有府二人史五人上州有佐四人史

七人中州有佐一人史四  
人下州有佐一人史三人

士曹司士參軍事掌津梁舟車舍宅工藝

有府五人史  
十一人大都

督府有府四人史八人中府下府有府三人史六  
人上州有佐二人史五人中州有佐一人史四人

參軍事掌出使贊導

武德初改行書佐曰行參軍尋又改曰參軍事初有丞使十五人後

省

文學一人從八品上掌以五經授諸生縣則州補州則

授於吏部然無職事衣冠恥之

武德初置經學博士助教學生德宗卽位改博

士曰文學元和六年廢中州下州文學京北等三府助教二人學生八十人大都督府上州各助教一人中都

督府學生五十人下府下州各四十人

醫學博士一人從九品上掌療民疾

貞觀三年置醫學有醫藥博士及學

生開元元年改醫藥博士爲醫學博士諸州置助教寫本草百一集驗方藏之未幾醫學博士學生皆省僻州

少醫藥者如故二十七年復置醫學生掌州境巡療永泰元年復置醫學博士三都都督府上州中州各有助

教一人三都學生二十人都督府上州二十人中州下州十人

大都督府都督一人從二品長史一人從三品司馬二人從四品下錄事參軍事一人正七品上錄事二人從九品上功曹參軍事倉曹參軍事戶曹參軍事田曹參軍事兵曹參軍事法曹參軍事士曹參軍事各一人正七品下參軍事五人正八品下市令一人從九品上文學一人正八品下醫學博士一人從八品上中都督府都督一人正三品別駕一人正四品下長史一人正五品上司馬一人正五品下錄事參軍事一人正七品下錄事二人從九品上功曹參軍事倉曹參軍事戶曹參軍事田曹參軍事兵曹參軍事法曹參軍事士曹參軍事

事各一人從七品上參軍事四人從八品上市令一人  
從九品上文學一人從八品上醫學博士一人正九品  
上下都督府都督一人從三品別駕一人從四品下長  
史一人從五品上司馬一人從五品下錄事參軍事一  
人從七品上錄事二人從九品上功曹參軍事倉曹參  
軍事戶曹參軍事田曹參軍事兵曹參軍事法曹參軍  
事士曹參軍事各一人從七品下參軍事三人從八品  
下文學一人從八品下醫學博士一人正九品上都督  
掌督諸州兵馬甲械城隍鎮戍糧稟總判府事

武德初  
邊要之

地置總管以統軍加號使持節蓋漢刺史之任有行臺  
有大行臺其員有尚書省令一人正二品掌管內兵民



總判省事有僕射二人從二品掌貳令事自左右丞以下諸司郎中略如京省又有食貨監一人丞二人掌膳羞財物賓客帳具音樂醫藥有農園監一人丞四人掌倉廩園圃薪炭芻稟運漕有武器監一人丞二人掌兵械廩牧有百工監一人丞四人掌舟車營作監皆八品下丞正九品下七年改總管曰都督總十州者爲大都督貞觀二年去大字凡都督府有刺史以下如故然大都督又兼刺史而不檢校州事其後都督加使持節則爲將諸將亦通以都督稱唯朔方猶稱大總管邊州別置經略使沃衍有屯田之州則置營田使武后聖曆元年以夏州都督領鹽州防禦使及安祿山反諸郡當賊衝者皆置防禦守捉使乾元元年置團練守捉使都團練守捉使大者領州十餘小者二三州代宗卽位廢防禦使唯山南西道如故元載秉政思結人心刺史皆得兼團練守捉使楊綰爲相罷團練守捉使唯澧朗峽興鳳如故建中後行營亦置節度使防禦使都團練使大率節度觀察防禦團練使皆兼所治州刺史都督府則領長史都護或亦別置都護都督府有掾有屬有記室參軍事有典籤武德中省

市令一人從九品上掌交易禁姦非通判市事

貞觀十七年廢

市令垂拱元年復置都督府三都諸州各有市丞一人佐一人史二人帥三人分行檢察倉督二人顯道納

史二人下州省丞

大都護府大都護一人從二品副大都護二人從三品副都護二人正四品上長史一人正五品上司馬一人正五品下錄事參軍事一人正七品上錄事二人從九品上功曹參軍事倉曹參軍事戶曹參軍事兵曹參軍事法曹參軍事各一人正七品下參軍事三人正八品下上都護一人正三品副都護二人從四品上長史一人正五品上司馬一人正五品下錄事參軍事一人正

七品下功曹參軍事倉曹參軍事戶曹參軍事兵曹參軍事各一人從七品上參軍事三人從八品上都護掌統諸蕃撫慰征討敘功罰過總判府事

上州刺史一人從三品職同牧尹別駕一人從四品下

武德元年改太守曰刺史加使持節丞曰別駕十年改雍州別駕曰長史高宗卽位改別駕皆爲長史上元二年諸州復置別駕以諸王子爲之永隆元年省永淳元年復置景雲二年始參用庶姓天寶元年改刺史曰太守八載諸郡廢別駕下郡置長史一員上元二年諸州復置別駕德宗時復省元和長慶之際兩河用兵裨將有功者補東宮王府官久次當進及受代居京師者常數十人訴宰相以求官文宗世宰相韋處厚建議復置兩輔六雄十望十緊州別駕

長史一人從五品上司馬一人從五品下錄事參軍事

一人從七品上錄事一人從九品下司功參軍事一人  
司倉參軍事一人司戶參軍事二人司田參軍事一人  
司兵參軍事一人司法參軍事二人司士參軍事一人  
皆從七品下參軍事四人從八品下市令一人從九品  
上丞一人從九品下文學一人從八品下醫學博士一  
人從九品下中州刺史一人正四品下錄事參軍事一  
人正八品上錄事一人從九品上司功參軍事司倉參  
軍事司戶參軍事司田參軍事司兵參軍事司法參軍  
事司士參軍事各一人正八品下參軍事三人正九品  
下醫學博士一人從九品下下州刺史一人正四品下

別駕一人從五品上司馬一人從六品上錄事參軍事  
一人從八品上錄事一人從九品下司倉參軍事司戶  
參軍事司田參軍事司法參軍事各一人從八品下參  
軍事二人從九品下醫學博士一人從九品下諸軍各  
置使一人五千人以上有副使一人萬人以上有營田  
副使一人軍皆有倉兵曹三曹參軍事刺史領使則置  
副使推官衙官州衙推軍衙推

京縣令各一人正五品上丞二人從七品上主簿二人  
從八品上錄事二人從九品下尉六人從八品下畿縣  
令各一人正六品上丞一人正八品下主簿一人正九

品上尉二人正九品下上縣令一人從六品上丞一人  
從八品下主簿一人正九品下尉二人從九品上中縣  
令一人正七品上丞一人從八品下主簿一人從九品  
上尉一人從九品下中下縣令一人從七品上丞一人  
正九品上主簿一人從九品上尉一人從九品下下縣  
令一人從七品下丞一人正九品下主簿一人從九品  
上尉一人從九品下縣令掌導風化察寃滯聽獄訟凡  
民田收授縣令給之每歲季冬行鄉飲酒禮籍帳傳驛  
倉庫盜賊隄道雖有專官皆通知縣丞爲之貳縣尉分

判衆曹收率課調

武德元年改書佐曰縣尉尋改曰正諸縣置主簿以流外爲之京縣上縣

丞皆一人畿縣上縣正皆四人七年改縣正復曰尉貞  
觀初諸縣置錄事開元中上縣萬戶中縣四千戶以上  
增尉一人京兆河南府諸縣戶三千以上置市令一人  
戶一萬以上置義倉督三人其後畿縣戶不及四千亦  
置尉二人萬戶增一人凡縣有司功佐司倉佐司戶佐  
司兵佐司法佐司士佐典獄門事等畿縣減司兵上縣  
有司戶司法而已凡縣皆有經學博士助教各一人京  
縣學生五十人畿縣四十人中縣以下各二十五人

上鎮將一人正六品下鎮副二人正七品下倉曹參軍  
事兵曹參軍事各一人從八品下中鎮將一人正七品  
上鎮副一人從七品上兵曹參軍事一人正九品下下  
鎮將一人正七品下鎮副一人從七品下兵曹參軍事  
一人從九品下每鎮又有使一人副使一人凡軍鎮三  
萬人以上置司馬一人正六品上增倉曹兵曹參軍事

各一人從七品下不及二萬者司馬從六品上倉曹兵曹參軍事正八品上上戍主一人正八品下戍副一人從八品下中戍主一人從八品下下戍主一人正九品下鎮將鎮副戍主戍副掌捍防守禦凡上鎮二十中鎮九十下鎮一百三十五上戍十一中戍八十六下戍二百四十五倉曹參軍事掌儀式倉庫飲膳醫藥付事句稽省署鈔目監印給紙筆市易公廨中鎮則兵曹兼掌兵曹參軍事掌防人名帳戎器管鑰馬驢土木通謁之事

上鎮有錄事一人史一人倉曹佐一人史二人兵曹佐史各二人倉督二人史二人中鎮錄事一人兵曹

佐一人史四人倉督一人史二人下鎮錄事一人兵曹佐一人史二人倉督一人史一人凡軍鎮五百人有押



官一人千人有子總管一人五千入又有府三人史四人上成佐一人史二人中成史二人下成史一人唐虞戊子每防人五百人為上鎮三百人為中鎮不及者為下鎮五十人為上成三十人為中成不及者為下成開元十五年朔方五城各置田曹參軍事一人品同諸軍判司專蒞營田永泰後諸鎮官頗增減開元之舊

五岳四瀆令各一人正九品上掌祭祀

有祝史三人齊郎各十三人

上關令一人從八品下丞二人正九品下中關令一人

正九品下丞一人從九品下下關令一人亦從九品下

掌禁末游察姦慝凡行人車馬出入據過所為往來之

節凡關二十有六京四面關有驛道者為上關無驛道

者為中關餘為下關丞掌付事句稽監部省署鈔目通

判關事

上關錄事一人府二人史四人典事六人中關錄事一人府二人史二人典事四人下關府一

人史典事各二人典事掌巡薙及雜當初諸關置都尉  
亦有他官奉勅監者上津置尉一人掌舟梁之事府一  
人史二人津長四人下津尉一人府一人史二人津長  
二人永徽中廢津尉上關置津吏八人永泰元年中關  
置津吏六人下關  
四人無津者不置

唐書卷四十九下

唐書卷四十九下考證

百官志四下王府官文學一人○舊書作二人

外官大都督府參軍事一人○舊書作二人

田曹參軍事○舊書無

上州司田參軍事一人○舊書無